



Чернобылал вирттал

Чернобылал АЭС-рал пІякъ учаврил биян бувсса зараллал ликвидаторуравух, билаят радиациялия буручлачиминнавух ивкІссар Шахъуйннал шяравасса Къандаев Исмяил МахІаммадлул арсгу.

13
лаж.



ШЯ

№ 16
(2330)

30 апрель 2026 ш.

РЕСПУБЛИКАЛУЛ ЖЯМАТИЙССА ВА СИЯСИЙССА ККАЗИТ

Кказит буклай бивкІссар 1917 ш.
Цунил итабакълан бивкІссар 1991ш.

Зарал бивсса инфраструктура ціу дуккан дантІссар



Дагъусттаннал ХІукуматрал председатель Абдулмуслим Абдулмуслимовлул, АьФ-лул СКФО-райсса полпреднал хъиривчу МахІаммад Рамазановлул, Аьрасатнал МЧС-рал граждан обороналул ва агъали буруччаврил департаментрал хъунама Олег Мануйлол ххал диргъунни Лакрал ва Ккуллал районнайсса тагъар.

Официалсса делегациялул вертолетрай тІабиаьтрап апатІрал зараллу биян бувсса

цаппара шяраваллал тагъар ххал дунни. Тиккусса цаппара шяраваллаву лахІунтту, лекъурду

дурчусса ишру хъуну бия.

Тагъар ххал диргъуну махъ миннал зараллан кьимат бишайсса къуллугъирттайн тапшур бунни ччясса ппурттуву зараллу бухлаган бансса ва тиккусса ялапарлувттурал мюхчаншиву дуруччинсса чаранну лякъин.

ХІ. АьДИЛОВ

Вирттаварал ниттихъулгу гъуртту хъунни субботникрай

Хасьсса аьралий операциялий ватандалул ххуллий чувшиврий жанну дуллусса аьралийтурал ниттихъул ва гъанчугу гъуртту хъунни Дагъусттаннал бакІчи Сергей Меликовлул сипталійсса экологиялул акциялий.

Аьралийтурал ниттихъул ва гъанчу бивккун бия Цалчинма Петрдул проспектрай ттигъаннуса риршу гъараллая махъ Вирттаварал аллеялуцІухсса кІанттурду марці буван. Вайннал шювшунни чапал хъусса вирттаварал баннерду.

Ва иш хъунни ватандалул мюхчаншиву дуруччаврил ххуллий жанну дуллуминнал аьпалул ХІурматрал лишанну.

Зулайхат ТАХАКЪАЕВА



Кабакъиннав виціун!

Апрельданул 22-ний Ккуллал райондалул бакІчину увціунни АХалидлул арс Ажуб ХІусманов.

2019 шиная шинай райондалул администрациялул бакІчинал хъиривчуну зий, 2025 шинал ноябрьданий администрациялул бакІчинал буржурчу ЧІумуйну биттур буллая, Ажуб Халидовичлул исват бунни цува вихшала дишин лайкъсса, захІмат ххирасса, агъалинал къайгъурду хъьичІ ххуттай бивхъусса каялувчи ушиву.

Ккуллал райондалул бакІчинал къайгъурду личІинува гъарзасса ва бигъа бакъасса бур. Ажуб Халидович зун гъирагу, шавкъгу дусса, шархъаву ялапар хъанахъисса халкъуннал масъалартту шинниаргу хъинну кІулсса инсан ур.

Умуд бур ванал цала ХІарачатгу, бюхъугу райондалул иш бачинсса куццуй ишла бувну, зунссар тІисса.

«Илчи» кказитрал редакциялул ва буккултрал цания жугу барча тІий буру вихъ, Ажуб Халидович, цІусса къуллугъ!

Винна вихшала дурсса, инава бакІрайн лавсъсса къуллугърал бурж лажин кІялану биттур булансса, агъалинашал ХІалагъурттуну райондалул масъалартту шаллу булансса кашикъудрат дуллуннав вихъхъун!

Ча тІий бурувин цІуллишиву, гъарица дуллалимуниву тІайлабацІу!

Подписка — 2026

**Дайдирхъуссар кІилчинмур
дачІи шинайнсса
«Илчилул» подписка!**

Федерал почталійх:

● дачІи шинайнсса – 552 къ. ● зуруйсса – 92 къ.

Дагпечатьрайх:

● дачІи шинайнсса – 252 къ. ● зуруйсса – 42 къ.

«Почта России» сайтрайхчин:

<https://podpiska.pochta.ru/press/П17046>

● дачІи шинайнсса - 552 къ. ● зуруйсса – 92 къ.

Апрельданул 12-ний Дагъусттаннал бакІчи Сергей Меликовлул наградарту дуллунни республикалул хьхьичІунну зузисса ялапарлувтуран. Ванал дуллунни наградарту аьпалул хьусса аьрралийтурал мачча-гьанссаннан, культуралул, элмулул зузалтран.

«За заслуги перед Республикой Дагестан» тІисса орден дуллунни Аьрасатнал Виричу Сяид Ибрагьимовлун. Меликовлул бусаврийну, Ибрагьимов хьанай ур Аьрасатнал Виричунал бюхтулсса ца ларьсса 19-ннавацца. Ва хьусса аьрралий операция байбихьунниа шинай талай усса ур хьхьичІмур кьюкь-

ХьхьичІунни барча бунни

луву, гьуртту хьуну ур Красно-Лиманскоелул чулий, Лисичанскрай, талай ивкІун ур роталул командирну Авдеевккалал чулий. Цанасса пурттуву ур мострелковий полкбрал батальондалул командирну.

Республикалул каялувчинал паччахІлугьрал наградарту дуллунни мукунна «Каспий» батальондалувасса ливтІусса доброволецтурал кулпатиртта хьун. Ванал жижарагу бунну, дакІ дансса махьру увкунни Башир Абдулссаламовлул, Кьур-

бан Аьшурбековлул, Рамазан ХІасановлул, МахІаммад Ибрагьимовлул, Бакирза Мохоевлул ва Абдулла Мусаевлул маччагьанна хь.

«Жула ватанлувтурал лайкьсса давуртта яла лаваймур даражалый кьулагьас дантІиссар. Хьусса аьрралий операциялул зоналий Дагъусттаннал виричусса аьсурваврал гьарца сятраву мюнпатну биттур буллай бур хьхьичІ бивхьусса бигарду, дуручлай бур жула инсантурал мухчаншиву. Жугу жушаву-

шаймур банну, миннал гьунарду тачІав хьама кьабитаншиврул», – увкунни региондалул бакІчинал.

Сергей Меликовлул «За доблестный труд» медаль дуллунни «Дагнефть» акционер обшестволул зузала, геолог Александр Овечкиннун.

ПаччахІлугьрал наградарту дуллунни культуралул зузалтрангу. Республикалул халкьуннал артистнал ца дуллунни Росгвардиялул 102-мур бригадалул аьралуннал оркестрда-

нул хьунама Илияс Бактамировлул, республикалул халкьуннал шаэр, Табасараннал театрдул литературалул ва драмалул бутлул каялувчи АьбдурахІм АьбдурахІмановлул, халкьуннал художествоарттал сянаирттал лайкь хьусса усттар – «Артель Кубачи» АО-лул каялувчи Нариман Хурдаевлул.

«Дагъусттаннал аьрралий муданнагу ца диркІссар пагьму-гьунар бусса инсантурал, кьалан битай устартурал, магьирсса сянаткартурал. Барча зун дуллусса хІурматрал царду», – увкунни Сергей Меликовлул.

**ХІадур бувссар
ХІ.АБДИЛОВЛУЛ**

Майрал байраннал хьхьичІусса гьантрай циньявпагу субботникрайн бувккун, шагьрулул кІичІиртту, жяматийсса кІантурду марці бавучьянира аьдатравун дагьсса акция дур.

Апрельданул 25-ний Дагъусттаннай баян бувсса субботникрайн гьуртту хьунни республикалул цинья шагьруду ва районну.

Кьархьунни царагу министерство, жяматийсса организация субботникрайн гьурттушинна кьадурсса. Бувккун бия волонтерталгу, кІанттул агьалигу, паччахІлугьрал влаьгьрал органнал вакилталгу. Шин ялтту ларгун зараллу бивсса кІантурду лазилакь бан чачІун шияра тІисса овьчаву дунни дагъусттанлувтурайн региондалул бакІчи Сергей Меликовлул.

Дагъусттаннал ХІукуматрал ва бакІчинал администрациялул коллективгу бувккунни шалагу Аьрасатнаву баян бувсса субботникрайн. Вайннал марцішиву дунни МахІачкьалаллал 59-мур школалул лагма-ялттусса, гьараллал зараллу биян бувсса кІантурдай.

СМИ-лул ва масс-медиялул зузалтрал, миннавух «Ичи» кказит-журналлал комплексрал чІаравсса «Времена года» сквер. Строительствалул министерство ва мунил биялдарийсса идарарттал коллективру зий бия Редукторный поселокрайсса Столичная кІичІираву. Цала чІаравсса кІантурду марці бунни Предпринимательствалул ва инвестициярал агентствалул зузалтрал. Туризмалул министрствалул зузалтрал лазилакь бунни гьараллал зия бувсса 3-мур Аварская тІисса кІичІиравалу. Юстициялул министрствалул коллектив зий бия кІива кІанай: Редукторный поселокрайсса Аграрная тІисса кІичІираву ва министрствалул кьатрал лагма-ялттусса кІантурдай. Транспортрал ва ххуллул хозяйствалул министрствалул коллективрал кумаг бунни Пальмира микрорайондалул агьалинан шин ялтту ларгун гьагьилил ва ччюрклил дурцІусса хІаятру лазилакь дан. Гьараллу ларчІсса чІумал шикку 1,5 м гьаз хьуну дуссия шин. ЗахІматрал ва социал лябуккулул министрствалул зузалтрангу биьга дакьасса даву дуллан багьунни. Пальмира микрорайондалий вайннал гьагьилил ца ва гьарал ласун дурсса аьрраца марці бунни бахьттагьалт заназисса кІантурду. Госжилинспекциялул зузалтрал марці бунни Солнечная тІисса кІичІиравалу.

Субботникру хьунни



Цифрал министрствалул коллектив зий бия Времена года, Туристическая ва Путешественников тІисса кІичІирттаву. Жагьилтурал министерство, ванил биялдарийсса идарарттал зузалт ва «Цалчинминнал Суккушинна» бувккунни 7-8 Фригатная ва Штормовая тІисса кІичІирттаву марцішиву дан.

Щулул-сагьшиву дуручаврил министрствалул коллектив ва 130-нния ливчусса медициналул организациярттал вакилталгу бувккунни субботникрайн. Вайннал ччюрклил ца марці дурну, лазилакь дунни азарханардал хІаятру ва лагмасса кІантурду. Бувгунни кІиязарунни ливчусса мурхьру, кьатІри ва тІутІив. КІяла дунни бордюрду, мурхьирдал ттарцІру. Му бакьассагу, медициналул зузалтрал ва волонтертурал кумаг бунни Дагъусттаннал агьалинан шин ялтту ларгун зараллу хьусса кьатри лазилакь дан. КІулушивуртту дулаврил ва элмулул министрствалул вакилтал зий бия кІива-шанма кІантурдай. Вайннал марцішиву дунни Звездопадная тІисса кІичІираву, мукунна министрствалул лагма-ялттусса кІантурдай.

Шиналу ливчІсса Дагъусттаннал халкьуннал кумаг бан Аьрасатнава увкІсса, миллионнайн бивсса аудитория бусса ца дуркьсса блогер Алексейл марці бунни чІярусса шиннардий салкь хьусса ччюрклил ца Хасавюрт шагьрулул ца кІичІиравалу. Инсантал шьябикансса скамейкагу бивхьуну, мурхьругу бувгунни.

Марцішивулул марафон лавайсса даражалый хьунни.

Анриана АБДУЛЛАЕВА

Цуссалакрал райондалия

Агьамсса проектру ххал диргьунни



Аьрасатнал Экономикалул Министерствалул департаментрал каялувчи Камил Бексултанов увкунни Цуминалийсса Цуссалакрал райондалийн. Ванал аьрххилул мурад бия «Развитие Северо-Кавказского федерального округа» тИсса АьФлул паччахИлугьрал программалул лагрулий буллалисса объектру ххал бигьинсса.

Камил Бексултановлул ххал диргьунни Цуссаккуллал шяравусса инфраструктуралул агьамсса проектру. Дакнин буган, гьашинусса шинал Цуссаккуллал шяраву цу дуккан дуллаи дусар кИчирттал ва ххулурдал сетьру. Мукунна дайдирихьуну дуссар Цуссаккуллал 2-мур школалул блокрал строительство.

Цуссаккуллал шяраву Бексултанов ивунни шин марци

дайсса сооружениярттал ва гьарал шин нани дайсса канализациялул строительство дуллалисса площадкалийн.

Объектру, сооруженияртту ххал диргьуну махь, ведомствалул каялувчи тIалав бунни 2026 шинал ахирданийнин, ва объектрал цалчинмур бутIувун духлахисса, кИчирттал ва ххулурдал сетьру цу дуккан дуллалисса давуртту кьуртал даву. Му бакьассагу, кИлчинмур бутIувун духлахисса давурттугу чялиш дуккан даву.

Хьирив Камил Бексултанов увкунни Цуссаккуллал 2-мур школа гьарта-гьарза баву мурадрай дуллалисса строительство ххал дигьин. Цуну буллалисса блок бур 604 оьрчансса кIану бусса, шиву бур актовый зал, кИва спортзал ва ттизаманул шартIру хIисавравун ларсун бусса пищеблок. КIулсса

куцуй, Цуминалийсса шархьавусса школардай яла гьарзану оьрчIру заназимур бур Цуссаккуллал шяравусса школа. Школалул пристройка даврийну, оьрчан ца сменалий дуклансса сант ххишала хьунтIий дур.

КIицI лавгсса объектру ххал бивгьуну махь, Бексултанов увкунни Цуссаккуллал шяравусса «Непоседа» тИсса садикрайн. Ва буну бур 2023 шинал «Развитие СКФО» тИсса паччахИлугьрал программалул лагрулий.

Цимурца хIисавравун ларсун, хьирив лавну, объектру ххал бивгьуну махь Бексултановлул дунни совещание.

Шикку кIицI лавгунни строительствалул давриву аьлтту хьусса диялдакьашивуртту ва бунни хасьсса маслихIатру.

Имара САИДОВА

Лакрал райондалия

Ятсса пикрирдая буруччаврил ххуллий

Ларгсса нюзмардий Лакрал райондалул бакIчи Зураб Куччаев ивунни КIамахьаллал ва Ппалассунна агьали ялапар хьанахьисса Бабаюртул райондалийсса Сангардал кьутандалийн.

Хозяйстварттал ялтту увкун, агьалинашалгу хьунаавкьуну махь, школалий хьунни терроданийн кьаршисса комиссиялул батIаву.

Муний гьуртту хьунни райондалул Депутатьтурал собраниялул хьунама Явсупи ХIамзаев, КIулшиву дулаврил управлениялул каялувчи Сулайман Шахмилов, АТК-лул отделданул каялувчи МахIаммад Гадаев, шяраваллал бакIчитал, шиккува ххал бивгьунни архсса кьутаннай жагьилтурал дянив жунна ятсса идеология ппив хьун кьаритансса чаранну.



Дуруччинну марци шиву

Дагьусттаннал бакIчи Сергей Меликовлул сипталийну шала Дреспубликалий баян бусса хьуннасса суботникрай чялишса гьурттушинна дунни Лакрал райондалул идарарттал зузалтралгу.

Чюрклици марци бунни цалацала идарарттал лагма-ялтгусса кIанттурду, Гьумучиял бярнил зума-кьирагь, беседкардал лагма-ялтгусса кIанттурду, гьарал шин лагайсса ххулурду, канализацияртту, кIяла бунни мурхьру, бьавкьултту, бивхьунни шюллишиву дусса кIанттурду. Укуннасса суботникру хьунни гьарца шяраву.

Райондалул бакIчинал хьиривчу Малик ХIусмановлул кIицI лавгунни суботникирттал кабакьу буллалшиву лагмасса тIабиаьт дуруччин, цивпа зузисса идарарттал лагма-халлу ва жьамат бигьалаган батIайсса кIанттурду цин лавхьхьусса тагьардаийн буцин.

Аьдатравун дагьсса суботникру

Республикалул шагьурдал ва районнал идарарттал зузалт чялишну гьуртту хьунни ххулункьинисса суботникирттай. Ва кьини Цуминалийсса Цуссалакрал райондалул шяраваллаву дунни суботникру.

ЧIавусса инсантал гьуртту хьусса, хьуннасса лагрулул суботник дунни Цуссаккуллал шяраву. Суботникрайн бивкунни шяраваллил жьамат, идарарттал ва администрациялул зузалт. Цуссаккуллал шяраваллил бакIчи Баграт МахIаммадовлул хIадур дурну дия даврил план. Цинявпа цачIун хьуну, марци буккан бунни тIабиаьтрал апатирттая бивсса заралу хьусса кIанттурду: лази-лакьы бунни идарарттал лагма-ялтгусса кIанттурду, марци бунни цинявпа ххулурду, кIяла дунни мурхьирдал ухру.

Мартрай гужсса гьараллу лачIлай, шяраву хIасул хьуну диркIсса тагьардануцIун бавхIуну, суботникру чяччяни дуллансса хIукму бунни Цуссаккуллал жьаматрал.

Шиккува кIицI лаган, Цуссалакрал райондалул школардай ва идарарттай чяччяни дайссар тIабиаьт дуруччаврил



цIанийсса суботникру ва экологиялул акциярду.

Давуртту кьуртал дурну махь, суботникрай гьуртту хьусса зузалтрахь барчаллагь увкунни Баграт МахIаммадовлул.

– Бургияра цуксса тIааьнну бурив лагма-ялтгусса кIанттурду марци буну, низамрайн бивцуну махь. Хьуннасса барчаллагь тIий ура давривух хIала бивхьсса

цинявпагу инсантурахь. КIицI лаганна, архIал зий, суботникру дуллаи халкьуннал дянивсса нахIу-хIалимшиву хьиннура цIакь шайшиву», – увкунни ванал.

Цуссалакрал райондалий уттигу найнна дуссар Ххувшаврил 81 шинан хас дурсса суботникру.

Имара САИДОВА



Мюхчаншиврул дарсру

Апрельданул 22-нийн шагьурдалу Аьрасатнал лавайми дуккавил идарарттаву, колледжирттаву, школардай ва детсадирттаву хьунни терактирдая, хаснува, махьзуманив аьрасатлултурал оьрмулул хьуннасса нигьачIаву хIасул дуллалисса беспилотникирттая мюхчан хьун лахьхьин буллалисса дарсру. Вай дарсирдал кумаг бантIий бур лавай бан кIулшиву дулаврил идарарттал мюхчаншиврул даража, микку зузминнал ва дуклакиминнал хархавар бакьасса иширттайнсса хIадуршинна.

Укунсса журулул дарсру хьунни Лакрал райондалул гьарцагу школалий ва детсадраву.

Миннуй гьуртту хьунни идарарттал мюхчаншиврул ялул бавцусса зузалт, педагогал, дуклаки оьрчIру. Дарсирдая махь ххал дирхьунни кIулшивуртту. Тапшур бунни духлаган дан ялун лирчусса диялдакьашивуртту.

Шардал школалул директор Мариян Ибрагьимовал кIицI лавгунни укунсса журулул меропряттиярттал агьамшиву: «Вай дарсирдал педагогтурангу, дуклаки оьрчангу кумаг буллалиссар хар-хавар бакьасса иширттайн хIадурну бикIан. Зузалтран ва дуклаки оьрчан жу лахьхьин буллаи буру нигьачIаву ялун нанисса ишираву анавархьиндарай ва куннацIун кув бавкьуну кьущу тIун».

Зулайхат ТАХАКЪАЕВА

Гьунчлукъатлув абад бунни вирттаварал аьпа

Дяшяраву Буттал Кланттул цланийсса Хьунмасса дяввилия зана кьавхьуминнал цла кусса Аьпалул чйрай лархьунни мармарчарил ултти. Вай кйягу цала хушрай лавгун бур паччахлугьрал мурадур биттур буллан, контракт чирчуну.

Аьпалул митинграй гьуртту хьунни шагьурдая бивксса хьамал, вирттаварал гьанчу, дуклаки оьрчлру, шярваллил жямат.

Митинг тйгу-тиртлуну, дачин дурну ия аьралийтурал аьпа абад бансса даврил сиптачи хьусса шярвучу, жяматийсса ишккаку, ДР-лул транспортрал ва ххуллурдал хозяйствалул министерствалул отделданул каялвучи Зиябуттин Хажимирзаев.

Ванал кйицл лавгунни гьарцагу аьпалул ула хьанахьшиву жула гьарцаннал аьмсса кьювуну. «Жува буржлувссару ватандалул ххуллий жан харж дурсса цумацагу аьскар жула хьирив нанисса никйран кйулну икйансса давуртту махь кьаритан», – увкунни ванал.

Райондалул бакйчи Зураб Куччаевлул цлания аьралийтурал гьанчунахь жижара бу-



Гьунчлукъатлрав шярвучу абад бунни хасьсса аьралий операциялий ватандалул ххуллий чувшиврий жанну дуллусса Махйаммад Ихяевлул ва Закир Аьлиевлул аьпа.

ни ванал хьиривчу Малик Хусмановлул.

«Хасьсса аьралий операциялий гьуртту хьанахьисса цумацагу жула ватанлул – хйакьсса виричури, цала аьралий буржйхй-кьирйятрай биттур буллалисса. Жула мурад – ватандалул ххуллий жан кьурван дурсса

гьарцаннал аьпа бурччавур», – увкунни ванал.

ДР-лул Халкьуннал Мажлисрал депутат Марат Илиясовлул кйицл лавгунни цала жагьилсса жаннай хйип кьакуну, ватандалул мурадур бурччин лавгсса вирттал халкьуннал дакйурдива кьабуккантйшиву. «Жуйвасса буржри вайннал кул-

патирттал чларав бацлан, вайннал цларду тарихраву личйансса давуртту буллан. Хйакьинусса мероприяту гьанахьиссар вайннал виричушиврул хйурматрал лишанну», – увкунни ванал.

Аьралий комиссар Аьли Гьазимахйаммадовлул агьамсса ххутгай кйицл лавгунни хасьсса аьралий операциялий жанну дуллуминнал аьпалул ултти Буттал Кланттул цланийсса Хьун

дяввилия зана кьавхьуминнал цларду абад дурсса чйрай ришлай бушиврул мяьна. «Жунна чйалай дур жула халкьуннал виричушиврул аьдатру никйрая никйрайн нанисса душиву. Тгатахьал аьпалул ва чувшиврул эьратрай бурччлай буссар вайннал наслугу ватандалул мурадур. Никйрттал дянивсса дахлавугу дурурччуну, гьарцагу солдатнал аьпа ябаву – жула яла кьалагайсса буржри», – увкунни ванал.

Ихтилатру бунни ДР-лул Жяматийсса Палаталул хьунаманал хьиривчу Ссапарбаг Аьбдуллаевлул, «Илчи» кказитрал хьунама редактор Руслан Кьардашовлул, Гьунчлукъатлрав шярваллил бакйчи Мухйад Штанчаевлул. Гьарма кйицл лаглай бия ватандалул ххуллий жанну дуллуминнал виричушиврул хйурмат бурччаву, тгизаманнул вирттаварал эьратрай ялун нанисса ник ватан ххирану тарбия даву агьамсса кьулагьасралу диклан багьлай бушиву.

Дуклаки оьрчлал дурккунни ватандалухасса ва аьралий темалун хас дурсса назмурду. Цацала кьюву ва кьурчйишиву кйидачйин бивкйириннахь барччаллагь увкунни аьралийтурал гьанчунал.

Зулайхат ТАХАКЪАЕВА

Чернобыллал АЭС-райсса авария 40 шин ларгун махь

1986 шинал апрельдалул 26-ний атомрал энергетикалул тарихраву хьуссар хьунмасса техногендалул апатй. Тания шиннай 40 шин ларгун махьгу, га апатйсса иширал биян бивсса зараллал хьирив лаллай бур, га иширал хйакьйраву тамансса шялмахьру, бусаларду ляхьан буллайнама бур.

Катастрофа хьуссар техникийссагу, сакиншиндаралссагу, инсан сававссагу факторду цачлун шаврийну.

Хьхьунил чйумал, ссят 1 ва 23 минутраву цакуну лахь хьуну бур активсса зоналул кьуват ва пйакь увкуну бур му зона. Кйира пйакь учаву хьуну дия: цалчин-

сса пйакь учаврийну дуцан дурну, гьавалувун палцл дурну дия азардаксса тоннарду дусса реакторданул магьй, кйилчин пйакь учаврил лекьан бивну бия активсса зона. Гьавалувун гьаз хьуну дия радиактив ххиттушалсса, графитрашалсса, гьавгьсса бетондалул касакйртташалсса ва муххашалсса хьуннасса ттурлу. Радиактивсса затирттал цачлусса кйушиву диркйун дур сайки 190 тонна. Атмосфералувун багьну бивкйун бур урандалул, плутонийрал, йодрал, цезийрал ва стронцийрал изотопру.

Цу лачйаврил ва радиоактивсса затру ппив шаврил захймат дурну дия тиккусса тагьар. Радиоактивсса ттурлу ппив

хьуну дия СССР-данул дазурдаяргу архну, дирну дия Европанавун.

Авария хьуну махьсса шанма зурул мутгалий ивкйуну ия 30 инсан. Острая лучевая болезнь азарданул кьашавай ивкйуну ур 134 инсан, миннавату 28 ивкйуну ия 1986 шинал.

АЭС-рал лагмасса 30 километралул зоналия, Припять ва Чернобыль шагьурдугу хйалану, бизан бивну бивкйиссар 115 азарунаха ливчусса инсантал. Махьми шиннардийгу бизан бивну бия ттуршазарахьул инсантал Украиннава, Беларусьнава ва Аьрасатнава.

Радиоактивсса затирттал ча-

пал бивну бивкйиссар тамансса кйанттурду. Так ца Беларусьнаву цезийрал чапал хьуну бивкйуну бур 23 процент аьрцарал, тикку ялапар хьанай бивкйиссар 2,2 млн инсантурал.

АЭС-рай авария шаврийну хьусса заралулу бухлаган бавривух гьуртту хьуну бивкйиссар сайки 600 азара инсан, чйявуми кйира шинал кьуллугьрайсса ва луртандалийсса (в запасе) саллатй. Апатй хьусса кйанайн цалчин бивну бия пожарниктал, миннавасса чйявуми литйунсса тагьарданий цуцйаврил бивгьуну бия.

Заралулу бухлаган бан бивкйисса ва тай кйанттурдая нигьачйаву

дакьасса кйанайн бизан бивсса ялапарлувтурава чйявуссаннай сукку хьуну дия онкологиялул, оьттул ва щитовидный железалул цуцйавуртту. Аьлимтурал уттигу дуллайнама бур радиациялул тагьарданул мониторинг (хьйирив лаявуртту).

Хйакьйну Чернобыллал зоналий дур кьадагьалул лишанну, кьатри дур дачйра лирчйун. Станциялул ххишала энергия дуккан дуллай бакьар, амма тикку ттигу пишакартал зийнама бур энергоблокру букьан бавриха ва радиоактивсса лув лирчймур цайми иширттан аьркин давриха.

Хй. АьДИЛОВ

Мукьва школалий зун тйий бур гьинттулсса лагерьду

Лакрал райондалул бакйчи Зураб Куччаевлул кабинетраву хьунни гьинттулсса лагерьду зунсса школардал директортурашалсса хьунабакьаву. Ваний ххал бивгьунни лагерьдал даву сакин даврийн багьайсса буруккйнтту.

Июньдалул 1-ний Лакрал райондалул мукьва школалий зий байбишинтйий бур дяхтгасса лагерьду: Гьумук – мйицйала оьрчйансса, Щарав ва Ккуркйив – кьуния ххю-ххюя оьрчйансса, Шавкйрав – кьуя оьрчйансса.

«Гьй – гьарцагу оьрчйан агьамсса чйунни. Цусса дукьаврил шин дайдишин хьхьичй оьрчйаша бюхьлай бур бигьалаган, цулул-сагьшиву цйакь дан, цу-цусса дустал лякьин, бюхьурду итххяххан бан», – увкунни Зураб Куччаевлул.



Ванал тйутйимунийн бивну, укунсса мероприятул кабакьу буллай бур каникулал чйумал оьрчйру итгалу бугьан, вайннал чйун мюнпатну гьан дан.

Лагерьду зун тйий бур кьуния цава гьантлий кйюрххил 9.00 ссятра ахттакьун 15.00 ссят хьунни.

Лагерьдай дузал дурну дикйантйий дур бюхь-гьунарду итххяххаврин ва бигьалагаврин кьулайсса шартйру. Программалулу бивкйантйий бур марцйсса гьавалийсса спортрал Туркйурду, творчествалул дуссухалу, буттал улча лахьхьинсса экскурсияртту. Хаснура кьулагьас дикйантйий дур санитар кьаралулу дуруччаврих ва дуклаки оьрчйал мюхчаншиврул ялул бацйаврих.

Гьинттулсса лагерьду сакин баву хьанай бур райондалул администрациялул оьрчйан ва кулпатирттан кабакьу буллалисса даврил ца бутйа.

Зулайхат ТАХАКЪАЕВА

Чернобыллай зий ивкйуну ур

Чернобыллал атомная электростанция пйакь увкуну 40 шин шаврицйун бавхйуну, Росгвардиялул вневедомственный кьаралданул Дарбантулал отделданул зузалт хьунабавкьунни та ппурттуву, авария хьуну махьсса гьантрай, тикку зузиминнавух ивкйисса отставкалийсса полициялул майор Хйашим Мамедовлушал.

1987-ку шинал Воронежлул милицанал школалул сержант Хйашим Мамедовлул барз бивну бур Чернобыллай. Цаймигу курсантйурашал ва дуруччлай ивкйуну заллухьруннал кьариртсса кьатри хьямалачитурая. Хйашим Мамедовлул дакйин дирчунни билайтрай оьсса бала хьусса кьинирду. Росгвардиялул зузалттал тай иширттаву ккаккан дурсса чувшивруху барччаллагьгу увкуну, дакйиний личйансса бахшиш дунни.

Адриана АьБДУЛЛАЕВА

Дусшиврийсса арарду цІакъ даврил фестиваль

Вай гъантрай МахІачкъа-Лалив, Автомобильно-дорожный колледжраву, хьунни Аьрасатнаву баян бувсса Халкъунал цашиврул шинан хас дурсса «Наша сила в единстве, богатство – в многообразии» тІисса фестиваль.

Ванил бусравсса хьамаллу-равух бия ДР-лул Транспортрал ва ххуллул хозяйствалул министрвалулул информацийлул ва аналитикалул отделданул хьунмур Зарема Кишиева, Кутузовлул ордендалул бригадалул 22-мур гвардиялул штабрал начальникнал бигарду чІумуйну биттур буллалисса полковник Александр Смирнов, ХІайдарбаг ХІайдарбаговлул цІанийсса Олимпий резерврал спортшколалул директор Шяьбан ХІайдарбагов.

Фестиваль дайдирихьунни Аьрасатнал ва Дагъусттаннал гимну учаврийну. Колледжрал хІайтраву тІивтІуну бия Дагъусттаннал миллатирттал культура, багъу-бизу, аьдатру ккаккан дуллалисса цаннир ца ххаллилсса майдану.

Шиккун бувкІсса хьамаллул хьхьичІ тІивтІуну бия дукърахІанттия тІайла хьуну, жалиндалул бакъухьарин биянинисса личІи-личІисса аслийс-



са миллатирттал дукрарду дуса, авадансса ссупрарду.

Цивпа майданугу, художествалул программарттугу хІадур дурну дия колледжрал преподавательтурал ва студенттурал.

Фестиваль дайдихьлай, гьурттучитал барча бувна Автомобильно-дорожный колледжрал завуч Мариян Мухтаровал.

– Укунсса мероприятиртай жагьилсса ник миллатирттал культуралуштал кІул даву дакъассагу, куннал куннашалсса дусшиврийсса арардугу цІакъ хьанхьиссар, – увкунни ванил.

– Даки ххари хьанай дур махьсса ппурттуву Дагъусттаннай миллатирттал маз, аьдат-эбадату ядаву ва дуруччаву мурадрайсса мероприятиртыртту дуллалаврия. ХІакьину, билаятрай захІатсса тагьар хІасул хьусса ппурттуву, ххишала дакъа тІалавну дур жува цинявппа цачІун буллалисса давуртту. Барчаллагьрай ура ва ххаллилсса байран хІадур дурсса колледжрал каялувчигурайин ва вайннал чІарав бавцІуминнайн, – увкунни ХІайдарбаговлул.

Цала-цала программа ккак-

кан дунни лакрал, даргиял, къумкънал, нугъайнал, ярусаннал, лазгиял, агьуллал, табасараннал, рутуллал ва оьруснал миллатирттал.

Лакрал майдан хьун бан Юсупова, ХІусайна ХІусайнаев ва Дагъусттаннал филармониялул артистьтал. Фестивальданий яла тяхьамур ва аваданмур майдану лакрал бия. Фестиваль лахьсса даражалый тІайла дуккан ччянива хІадур хьуну бия колледжраву хьхьичІунну зузисса пишкартал: Фариза Сайпуллае-



ва, Марижат МахІаева, Заира Буттаева, Марианна Жалалова, Асият Мусаева ва Михаил Акаразуев.

Фестивальданул лагрулий хьунни «Дагестанский аул» тІисса этнографиялул музейрал «Традиционный женский костюм народов Дагестана» тІисса цІанилусса суратирттал выставка ва Р. Аьшуралиевлул цІанийсса Технический колледжрал студенттурал творчествалул (миллатирттал январдал) презентациярттугу.

Имара САИДОВА

Къянкъами цачІун буллалисса марафон

Вай гъантрай республикалий хьунни «Тинькофф Dagestan Wild Trail-данул» хІадур дурсса зунтгавух ва зунттайх лечаврил марафон. КІицІ лаган, вайннал Аьрасатнал регионалий шинал лажиндарай дулла бур 6-7 марафон – программа хІасул хьуну дур 10, 20, 30, 50, 70, 100 километрал манзилла.

Гьуниннал шярава дайдихлахьисса дистанциярттай гьуртту хьуну бур 4000-нийн бивсса, Аьрасатнал регионалий бувкІсса, трейлраннинграхун (зунтгавух, вацІравух, авлахьирттайх лечлачисса спорт) багьсса спортсментал. Ва спортрал бьст-ччаллу ккаккан баву бакъассагу, Дагъусттаннал билаятрай караматсса тІабиаьтрашал, хьамал ххирасса инсантурашал кІул буллалисса хьуннасса агьамшиву дурсса ишну хьанхьиссар.

Зувира километралул манзилданийх 1700 метра бакІлавайсса ва 2350 метра бакІялавайсса ххуллийхсса марафондалий левчуну ур Дагъусттаннал альпинист, ДР-лул лайкъ хьусса строитель Зиябуттин ХІажимирзаев. Ва манзилданийсса лечаврий гьуртту хьуну ур трейлраннинграхун агьсса 600 профессионал. Къарадах шярава байбихьуну, зунттайх, хьачІ-бакІайх, къума ратІавухсса ххуллурдайх левчуну, Гьунивсса «Орлиное гнездо» тІисса турбазалучІа хьуну дур марафондалул ахир.

«Зунттайх бакІлавай лахьлай, ялавай бучІлай, тик диркІсса лахьзаннайх лахьлахьисса, хьинну захІатсса ххуллу бия. Гьарица дистанциялий ккаккан дурсса чІумуй




финишрайн биян аьркинну бия. Ттуштал 30 километралул манзилданийх лечлай уссия ттула дус, цІанихсса альпинист Денис, 75, 100 километралул манзилданийх левчунни альпинисткахьул Оля Румянцева ва Галя Одышкина.

Вай хьинну спортграхун багьсса, гужсса душру буссар. Вайнаштал бьст бан къашай», – тІий, хьярч буллау ур Зиябуттин ХІажимирзаев.

Ва цалчин акьар укунсса марафондалий гьуртту хьанхьисса. Ларгсса шинал 35 километралул манзилданийх левчуну, ккаккан дурсса чІумуй финишрайн ивну, ванал медаль хІалал дурссия.

Гьашинусса марафондалул лагрулий гьурттучитурал кумаг бунни тІабиаьт гьалак дурккун зараллу хьусса инсантурангу.

Имара САИДОВА



Ларгсса нюжмардий, на, «Илчилул» хъунама редактор Руслан Къардашов, ва корреспондент Хасан Аьлилов бивссияв Мамедкъалалив ци тагъар дурив ккаккан, щинал аьтартгал думуницла буну ливчИсса агъалинашал хъунабакьин.

Тихун бачиннинма цIуххубусу буну, жу кIул бивссия ларкралми кулпатру чув буссарив, вайннал адресру. Хъунабавкъуру Цалчинмур ЦIувКратусса Аьлиловхъал шанмайва кулпатиртташал. Шама уссу чачIу-чIарав яхъанай ур шикку, ца лахIзалул мутталий шанмагу кулпат къатта-къушлица, хъускъинилуца хъуну ливчIун бия. Жухъ хъумуния укун бивсунни Загъидат Аьлилова: «КIулбакъа бала ялун къабияннав хIазран къаучайхъунсар, мукунсса бала бивна жул ялун хъхъуниву. Полициялул зузалтрал нузайн къутI куну, анаварну документругу лавсун, насыра, Мамедкъала щинавун гъансса нигъачIаву дур куна. Ци чIав къай ласун, канил дугъан шайсса мутта бакъ-

Аьрххи-ххуллурду

«Мамедкъала щарай бия та къини»




Загъидат Аьлилова



Зараллу бивсса чIаххул цацIун хъуну дукра дуллай

ая, анаварну буккан багълай бия. Жу дахъва муххал ххуллул ялун гъаз шайхту, мугъалттал жулва къатрайнсса гъужумрах ялугълай бивкIру. Та шпуртгуву жува сагъну личIаврия шукуру барча бакъа, цамур пикри бакIравунмагу бухлай бакъая. Хъирив къини жу лавгру жулва къатра ябитан: оьрмулукун зий, захIмат буллай бивкIсса къатригу дакъин дан къахъунсса даражалий къини дурккун ляркъунни, думургу гъагълил гъулуртуну. Цукунсса асарду бикIансар жул дакIурдиву? Щала оьрмулий бивцири захIматрал суартру итталух занай дакъарив. Къянкъа дарду. ЯхI къабунугу чара бакъая, лагма-ялтту ливтIуссагу хъуну бия. Тайннай аьтIий бивкIру. Лажиннича плотиналул ялувбацIаву дуван аьркинминнал укунсса баччибакъулшиву дурну ва къини агъалинайх дуккан ритан аьркинссияв? Хъунмасса барчаллагърай бура чIарав бавцIуминнай, жула шаравалил жагъилтал бивкIунни, къатри марцI буллай бивкIунни. Ккуллал ва Лакрал районная бивкIунни, гъан хъанай: «Ци кумаг бави, ци аьркинни?» тIий



Шамил Аьлилов

цIухлай бия. Укун дакI цIуцIаву дусса инсантал чIалай, буруккингума буклай бия дакIнива. БакIра-бакIрах барчаллагърай бура кумаграл ка тIиртIуманайн, чIатIа дургъуну зий ивкIманайн, нахIусса мукъуйну дакI дуванмур буллай ивкIманайн».

Бивсунни та къинилия Шамил Аьлиловулгу, ванал чIаххучу Ражаб Исмяиловулгу ва СунбатIуллал шаравасса Роза Аьбдулхалимовалгу. Вайнналим къатрангу хъунисса зараллу хъуну бур, къатлул къай-къуй, матахI ишла дуван хъунсса даражалий дакъар.

«Уттинингу хъуссар щин ялтту лавгсса ишру, ва бала-мусиват кквккун акъара, щинал лавсун лавгун бия лагма-ялттуса къатри. Полициялул мугълат бакъа лихъияра, 15 минутIрава мугъалтту буккантIиссар учайхту, ция жу ласунтIисса? ЧIявуми документругу ласун къавхъуну бивкIсар къатрава, буккансса иш къавхъуну мугъалттавах гъузуй ххассал хъуссагу, ххассал хъун къавхъуссагу бур», – тIий бивсуна Шамил Аьлиловул къатри бивкIсса кIанттугу ккаккан буллай.

«БивкIунни комиссиягу, шагърулул администрациялул вакилталгу, гъармур ххал дунни хъирив лавну. Ттул хIаятраву гъалмахчунал машинагу бивсиса, вагу зия хъунни ттуллами хъуслициун. 10 сотка дулун аьркинсар ттуун утти цамур кIанай къатри дуван. Документру батIин, аьркиннийн биян биван, лечлан багълай бур. Цалсса ва аваралуву миннулсса буллан бивару», – увкунни Ражаб Исмяиловул.

Бивру жу Гуманитар кумаг буллагисса центр тIивтIусса мизитравун. Тикку волонтертал будувкъуну бивкIсса кумаг ликкан буллай, бачIлай бия. Кумаграл даврия бивсунни Сайпуллагъ Къурбановул:

«Цалчинмур къинива гуманитар кумаг букIлай бия республикалул щиняв шагърурдая ва районная. Мукунма Аьрасатнал регионная ва СНГ-лул билаятиртая. Зунма чIалай бурхха душру ва чиваркI бачIинсса, тIайла буккансса кумаг личIи буллай зий бушиву. Жу Мамедкъалалив бакъагу, Дагогни шагърулийнгу гъан буллай буру кумаг. Инсантал думур, аьркинмур лавсун букIлай бур: дуки-хIачIия, ини-къали, ччатI, компотру. Шайма шаймур буллай бур, хъхъу-къини дакъа бакъавцIуну зий буссар волонтерталгу, кумаг аьркиннийн чIумуй биву мурадрай».

Культуралул къатлувугу зий бия Гуманитар кумаг къамул буллагисса ва бачIлачIисса центр ЧIирайн лархъун дия Мамедкъалалал кIичIирттал карта. Ва картагу ккаккан дурну, бивсунни НурмахIаммад КъурамахIаммадовул: «Вана карталий аьлтта чIаланну ккаккан буну къини дурксса кIичIиртту, яла кумаг цумур кIанайн аьркинну буссарив ва них бурувгун мяълум бувайсар. Штабрайн дучIаймунил, гъармунил сияхI дуллагиссар, та ва щия дуркIсарив, итадаркъумунил сияхIгу мукунна: та ва щичIан тIайла дуркIсарив, ци ва циксса гъан дурссаривгу. Кумаграл набордал сортировка дуллагиссар, агъамми мукъра набор личIи дурну: продовольственный набор – щин ва иникъали, яла дуки-хIачIия ва ичIаллинсса



Шикку дуссия кIиягу уссил къатри





Шикку буссия машинарттачалсса кива гараж



Сайпуллагь Кьурбанов



Культуралул кьатлувусса Гуманитар кумаграл центр

химия. Дуки-хIачIия ва бытовая химия личИи-личИину ядуллай буссару. Дуссар лаххиягу. Кьини дуркманаша цацавагу увкIун аьркинмур тIалав дуван, ласун шайссар. Гьаннайсса, гуманитар кумаграл сортировка, бачIаву, аьркинначIан биян баву сантирай ва лябуккулий най дуссар».

Тиккура чIирайн лархьун дия арцуйнусса кумаграл хьирив букканшиврул цукунсса документру батIин аьркинссарив бусласисса плакат. БувчIинну чивчуну бия компенсация була-ласаврил низамрая.

СВО-лул Аьрасатнал Виричу НурмаIаммад ХIа жима хIаммадовлул цIанийсса «Патриот» тIисса ихIсандалул фондрал чулуха чапалсса шин дурхсса кIанттурдай лахьай азардая буручиншиврул, кьини дуркминнан дуларду антисептикругу.

Шагьрулул кIичIиртту КАМАЗ-ирттал ва кумагру буллалисса волонтертурал бувцIуну бия. КIивашанма мукьуйну учин, Мамедкьала шарай бия. Амма булукьуну кумаг буллалиминнал кьюкьригу чIалай, гуманитар кумаграл давугу сантирайн руртун душиву хIисавравун ларсун, ччяни балаллува лайкьну букканхьуви Мамедкьалалал агьлу тIисса вихшалагу дакIурдиву цIакь хьанай дия.

Руслан КЪАРДАШОВ



Мизитравусса Гуманитар кумаг буллалисса центрданий думуница хьусса агьалинан дукра дуллай



НурмаIаммад КьурамаIаммадов



Шикку буссия багь



Кумагран дуркIумнил ва итадаркьумнил сияхIру дуллай

Лакралмур майдангу яргну бия

Апрельданул 22-ний МахIачкьалалив, Семендердайсса 58-мур школалий, дунни миллатирттал культурулул шагьрулул «Балайлул ва хиялал хьаттирдай» тIисса фестиваль

Ва, 2017 шиня тIайла хьуну, гьарца шинал интту дувайсса, аьдатравун дагьсса фестивалли. ЧIявусса миллатру яхьнахьисса поселокрай хьамаллуран хIадур дурну дикIай авадансса программа: миллатирттал балайрду ва кьавтIавуртту, мастер-классру, личи-личисса пишардал заллухьруннал, магьирсса канил устартурал ярмарка, арт-проектру, выставкартту. Унгу-унгунусса байрандалийн багьай хьамал мийжаннугу.

Фестивальданул бусравсса хьамаллуравух бия шагьрулул КIулшиву дулаврил управленилул хьунмур Шаганэ Баймурзаева, Дагьустаннал Чичултрал союзрал хьунаманал хьиривчу Супиян Омаров, ХIамзатовлул цIанийсса Национал библиотекалул культурулул программарттал отделданул хьунмур Ольга Аьлиева ва цаймигу.

Фестивальданул дайди хьудуллалисса махь лахьлай, Шаганэ Баймурзаевал КIицI лав-



гуна Аьрасатнал Халкьуннал цашиврул шинну баян бувсса ва шиналсса фестивальданулгу чIалачIи буллалшиву агьали, миллатру, культуруларду, динну личи кьадуллай, бавкьуну яхьанан ччай бушиву.

КIицI лавгьсса школалул директор Шамил Аьлиевлул хьамаллул делегация мил-

латирттал майданнайх буккан бувна. Ххуйя лакралмур майдангу. Ва школалий лакку мазрал дарсру дихьлай буссар Цалчинмур ЦувIратусса Зина Омариева. Ванил мудангу хIарачат бувай лакралмур майданнал цаькьини хьун дуван. Оьвчай машгьурсса балайчитурайн, музыкантьтурайн.



Шарапи Ажубов цала зюна нав гьоргутIи бунну ия. Лакрал дукрардал урцIигу аваданса дия: дукьра хIан, аьрайнгьавккури, кьачIив, хьхьахьхьари. Хьамаллулгу, лакралмур ссупралучIа аглан хьуну, лакку дукрардал тIин ххал бувна. Зина Омариева ва вава школалий зузисса цIувIградуш Зиттанат ХIусайрамазановал бувсуна хьамаллул я бавцIуми лакку дукрардал рецептирдай.

«Сайки циняв дагьустан

мазурдий назмурду дурккунни оьрчIал. Ккаккан бунни пьесарду. Оьрус мазрайгу, ниттил мазурдийгу. Нава личИнува ххари хьунна, миллатирттал мазру оьрчIан лахьхьин буваврих школалий кьулагьас душиву чIалай. Жу экскурсия бунну циняв кабинетирттал бувкру. Бия фольклорданул коллективрдугу, халкьуннал байран дия», – тIий ур Супиян Омаров, цалва асарду КIибачIлай.

Патимат РАМАЗАНОВА

ОьрчIру аьдатирттая арх кьабуцаншиврул

МахIачкьалалив, Умумпазил Муртузалиевал цIанийсса Социал адаптациялул ва профориентациялул республикалул центрданий, «Дагьустаннал культура ва аьдату» тIисса фестиваль хьунни. Ва цурдагу хас дурну дия Аьрасатнал Халкьуннал цашиврул шинан.

Фестивальданул сиптачи ва сакиншинначи бия центрданул директорнал хьиривмур ХIабибат Шахилова. Ванил кумагчиталнугу бия лавайми класирттаву дарсру дихьлахьисса педагогтал.

Байрандалул гьанумур мурад бия дуклаки оьрчIан Дагьустаннал аьдату, лаххия, гьаннайсса, фольклор ва культура хьама кьаританшиврул минну бусаву ва ккаккан дуваву. ХIатта, хьатIул аьдатургума дия программалулу.

Педагогтал ва дуклаки оьрчIру сайки циняв миллатирттал лаххиярдаву бия. Балайрду, кьавтIавуртту, миллатирттал нахIу-нацIусса дукия – гьарзат унгу-унгунусса байран бавтIирирнинан пишкаш дуван кьастирайсса.

БавтIирирду чIявуя. Цинявпагу байрандалушал барча бувна КIулшиву дулаврил ва элмулул министрствалул вакил Мисиду ХIажиевал. Центрданул каялувчи Амирхан Амирхановлул КIицI лавгуна, Дагьустаннал авадансса культура ва буттахьал аьдату ирсирай дирсса рувхIанийсса ххазина хIисаврай ябуваврицIун, чара бакьа ялун нанисса никирангу ми дуруччаву жула агьаммур буржну хьнахьшиву.

«Миллатирттал культура ва



аьдату гьанулун ларсун тарбия булан багьлай бур дуклаки оьрчIру. Фольклорданун, культуруларун хасьсса укунсса байраннугу чIяву миллатирттал оьрчIру дуклакисса центрданий дуллалаву – ва хьинну ххуйсса ва чара бакьа дуван багьлагьисса давур, жунма жула оьрчIру миллатирттал мазурдия, тарихрая, культурулария, ппхьлуннал аьдатирттая арх буцан битан кьабучIиссар», – увкунни ванал.

Культурулул программа халкьуннал артистка Луиза Шахдиловал. Хьамаллул ванил балайрду хьатру ришлай кьамул бувна. Дуклаки оьрчIал ва байран хIадур дурсса педагогтурал ккаккан дурна хьхьичIарасса кьавтIавуртту, ниттил мазурдий бувккунна шеьрирду, ккаккан дурна аьдатирттая бусласисса инсценировкартту.

Гьакьсса ххуйну ва лахьсса даражалый хIадур дурну дия сакиншинначитурал шадлугь, бавтIирирнинан, хаснува оьрчIан



цанна дакIний личIансса, ххуйсса асардал видурцIусса. Гьайгьай, миллатирттал дьанивсса дусшивугу яргну ккаккан дуллалисса шадлугь дия.

хьун махь булав цахьис махьату шалва коллектирашал хьнабавкьуну, центрданул даврия балжину бусан «Илчилул» буккултрахьгу.

приятярттугу ччя-ччяни дувайссар», – увкунни Мадина СантIуевал. Жугу хIадурсару вайннува буслан.

Патимат РАМАЗАНОВА

«Илчилул» календарь Ва зуруй бувссар:

Май зурул 4-нний 1954-ку шинал увссар техникалул элмурдал кандидат, профессор **Къурбан Къурбанмахаммадов.**

Май зурул 5-нний 1921 шинал увссар Совет Союзрал Виричу **Ризван Сулайманов.**

Май зурул 5-нний 1960 шинал увссар жяматийсса ишккаку, ишбажаранчи **Хижи Хижиев.**

Май зурул 8-нний 1894 шинал увссар Дагъусттаннал литературалул классик, революционер, «Илчи» кказитрал цалчинсса редактор **Гъарун Саэдов.**

Май зурул 8-нний 1928 шинал увссар чичу **Зияуттин Айдамиров.**

Май зурул 9-нний 1926 шинал увссар генерал-майор **Ися Пирмахаммадов.**

Май зурул 10-нний 1927 шинал увссар шаэр **Бадави Рамазанов.**

Дагъусттаннал боксертуран наградартту дуллунни



Аьрасатнал президент **Владимир Путин**нул Дуниядулул чемпионатрай ххув хьусса Дагъусттаннал боксертуран дуллунни паччахьадугьрал наградартту.

Шама дагъусттанлувал – Муслим Хажимахаммадовлул, Шарапуттин Атаевлул ва Жам-

булат Бижамовлул дурхссар чемпионтурал мухлурду Аьрабустаннал Цачунхьу Эмиратиртай хьусса боксертурал турнирданий.

«ДакИнийхтуну ххариссара цинявннахь барча учин зул хьхьичуннайшиву. Зул ччалли буккавурттал ва хьасиллал

тасттихь буллалиссар дунийдулул спортраву Аьрасатнал цакьну хьхьичунсса клану бутълай бушиву», – увкунни спортсментурахь Аьрасатнал президентнал.

Боксертал барчагу бувну, наградарттугу дуллуссар Дагъусттаннал бакчи Сергей Меликовлулу.

ХИ. АБДИЛОВ

Пресс-конференция

Жуннагу, жулва хъамаллувангу

Апрельданул 27-нний Дагъусттаннал Туризмалул ва халкьуннал художествардал промьслирдал министерствалий хьунни ванил бакчи Эмин Мердановлул пресс-конференция.

Шикку гъаз бувсса суаллаву бия ттигъанну республикалий хьусса Табаьтрал бала-хатгасса иширттал туризмалул бувсса заралданиямур. Министернал кици лавгунни вай иширтталшиврий республикалийн наниминнал, бучлан ччиминнал квал, бронирование яларай дагъшиву.

-Ва чумуйнусса захматшивур, тагъар хьин чулийннай кIура даен дуван шаймур буллау буссару. Умуд бур интнил ахирданий, гьинтнил дайдихулий туризм махьсса шиннарди жува аьдат хьусса кушуйсса бушилийн дучланссар тIисса, – увкунни ванал.

Пресс-конференциялий гъаз бувсса масъаларттавух бия туристътурацун дархIусса даву «ххютулу», кьютIну, закондалийн къабуну шаллу дуллалиминнацIун, гидтурал ва экскурсоводтурал аттестациялуцIун бавхIумигу. Министернал мукъурттийну учин, легальный дакъасса бизнес – му республикалул бюджетраву ялундучия къадуркIун личлачIимургур, туристтурал цIуллу-сагъшиврунссагу, оьрмурдансагу нигъачIишивугур. Туристтал гьуртуну хьусса бала-апатIсса иширттава чIявумигу закондалийн къабуну зузисса туроператортурацIун бавхIусса бур. Ва ххулийгу министрствалул дуллалисса давуртту чансса дакъар. Ларгсса шинал, масалдаран, 400-нний ливчусса объектирдайн (отель-



лу, гостиницарду, хъамаллуванрансса къатри) тапшурлугьру дурну дур турист индустриялул объектирдал Цасса реестрданувун сведенияртту булунсса. 2025 шинал ва ххулий къадагъа дирхьусса 410-ксса иш хьуну бур, вай, министрнал тIимунийн бувну, хьинну чIявуссар, билаятрал циняв регионнаву вайнну-яр ххисса так Москвалив ва Москвавулла областрай бусса бур. Ва даву шаллу даврийну бовхьуну бур чIявусса «кьютI бивхьусса» объекту закондалул ххулий зузи буван.

Министернал гьарта-гьарзану бувсунни Дагъусттаннал ца хьуннасса инвестицион проектрайгу – Каспийскалал прибрежный кластер баврицIун дархIуми давурттагу. Вания хьун аьркинссар Дагъусттаннал цIусса турист инфраструктуралувусса ца яла я бацанмур проект. Ва зунтIиссар Дарбантулал райондалий. Ванийн бувну республикалул ки-

блалийсса районугу, шиккунсара аьрххирдугу туристътураву машгьур хъанантIиссар.

Ихтилатру ялагу хьунни Табаьтрал объектирдача къабавай ци-ци-дунугу дуллалаврийн, лашинсса санитар тагъарданийн багъайссагу.

Бувкунни туристтурал мюхчаншивруцIун бавхIуми масъаларттайнгу, ялу-ялун машгьур хъанахьисса паломнический туризмрайнгу, мукунма «волонтерский туризмрайнгу» – билаятрал личIи-личIисса региона кумагран жучIанма бувкIсса волонтертурайнгу.

Хьунабакъаврил ахирданий Эмин Мердановлул барчаллагь увкунни республикалийн кьини дурксса чIумал ка-кумаг бувсса ва буллалисса экскурсоводтурахь, отельертурахь, бигъалагай къатрал заллухьруннахь, волонтертурахь, ишбажаранчитурахь ва цайминнахь.

Бадрижамал АБЛИЕВА

НОВЫЕ УСЛОВИЯ ДО 31 МАРТА

2 млн руб. – от РД через ПЭК резерва

Единовременная выплата

2,5-2,9 млн Р*

Зарплата **от 210 тыс Р**

400 т.р. – РФ, от 100 до 500 т.р. – от муниципалитета

117 фед. номер

Пункт отбора по РД
8 (989) 484-69-95

Контрактрайну аьралуннаву къуллугъ буллан къамул буллай бур

Контракт чирчусса республикалул ялапарлувтуран дулайссар 1 млн къуруш цалархIал:

500 000 къуруш – Дагъусттан Республикалул чулухату;

400 000 къуруш – федерал бюджетраву (гъашину августрал 1-нний 31-ннийн контракт чирчуминнан);

100 000 къурушраяр къачансса – шагьурдал ва районнал чулухату.

Контрактникнал харж – 210 азарда къуруш зуруй.

СОЦИАЛ ХIАЛЛИХШИННУ ВА ГАРАНТИЯРТТУ:

- бовхьлай бур ччяни къатри ласун Аьрасатнал Обороналул министрствалул счетрайну накопительно-ипотечный системалийхчил;

- къуллугьрал къатри дулайссар ягу лаякъатрахлу лахъаву (компенсация) дайссар;

- Аьралуннал медициналул азарханалий укв ххал увайссар, хьин айссар ва реабилитациялий итайссар;

- Федерал бюджетрал счетрайну оьрмулул ва цIуллу-сагъшиврул страхование дайссар;

- 20 шинайсса къуллугъ бувну махь хIаллихшиндарал (льготная) пенсиялийн уккайссар;

- талатаврил иширттал ветераннал статусгу, мунин хасьсса хIаллихшиннугу ккаккан дайссар;

- Аьрасатнал Федерациялул субъектирдал цал дулайссар ялун ххи дурсса арцу (единые дополнительные выплаты) ва гарантиартту контрактрайну къуллугъ буллалиминнан;

- кредитрал ва налогирттал каникуллу;

- оьрчIру вузирдаву дуклаки буллансса бюджетрал кIанттурду;

- контрактниктуран ябайссар цивппа зий бивкIсса зузи кIанттурду;

- оьрчIру уква бигъалаган тIайла буккайссар цIуллушиву цакь дайсса гьинтнил лагердайн.

Аьралуннаву къуллугъ буллан язи бугъайсса кIанттурду зий бур жула циняв шагьурдайн ва районнай.

Дагъусттаннай мукусса кIану: **8(989) 484- 69- 95**

ДР-лул Военкомат: **8(8722) 68-16-08**

Лакхъсса даражалул муаьллим

Мартрал 30-ний Лакрал театрдану хъусса мажлисрай ттула ххирасса муаьллим ва насихатчи Шагьимардан Акниевлуцунсса дакИнин бичавуртту.

На хьинну ххари хьура кИицI лавгсса мажлисрай гьуртту хьун шаврия ва Шагьимарданул шеърирдал жуж ласун бюхъаврия.


Шагьимардан Къзакъилаевич дакИнингу увтун, лакку мазгу, лакрал ва Дагъусттаннал культура гъаз дуллаи мунал цуксса захIмат бувсаривгу ХIсавравун лавсун, жува мунал цIа гъаз дан хIарачат бан аьркинссар тIий ура. На умудрай ура, му даву дарча, мунийну Шагьимардан Акниевлул цIа абад даву бакъассагу, жула оьрчIавунгу, оьрчIал оьрчIавунгу мунал дуллаи ивкIсса давурттал бутантIиссар лакку маз куртIну лакхлансса гьира, гъавас, хьунтIиссар лакрал балайрдугу, макъаннугу ишла дуллаи, жула культуралул даража гъаз бан. Шагьимардан Къзакъилаевич ттун лакку маз куртIну лакхъьин бувсса муаьллимри. Му бакъассагу, ва ия ттул насихатчигу, мачачунал кIану бувгъусса, ттула буттачIа хIурмат бусса инсангу.

Шагьимарданнун ттувусса, ацIра шинавусса оьрчIавусса, гьунарду, хIарачатгу ХIсав хьуну, на музыкалул ва творчествалул ххуллийн тIайла увссара. Балайлул дарс дихлай, на хордану гьуртту хъанахъисса чIумал, ганан ттул чIунил ляличIишиву бувчIуна. Цал дарсирай, класрал хъьичI хъусса жула ихтилатраягу бусанна гихунмай.

Учительнаясса хавар

Цал, балайлул дарсирай, учительнал ттухъ увкун: «Къурбан, вин райондалул радиолувух балай учин багълай бур». – Къачча, куну, на рязи къавхъура. Амма ганал, нагу аьличIан увну, балай учин на личIи увшиву бувсуна. Балайлухун макъан 6-мур классраву дуклакисса Шахъуватусса Шакир ХIасановлул аккордеондалий дуцинтIишивугу бувсуна. На ялагу рязи хъанай акъара, навалу къаучинна тIий. Учительнал кIукIлуну цIувххуна: «Щищал учин ччай ура?», – куну.

Жулва классрал каялувчи ПатIимат МахIаммадовнал арс Шамил Каримов ккаккан ував (махъ ваная Дагъусттаннал халкъуннал артист хъуссар). Га ттул дусгу ия, ттун ганал чIугу ххуй бизайва. Шамилгу рязи хъуна. Учительнал цIувххуна: «Ци балай учинна?». На жаваб дулуннин, «Вяркъу Къянн лавгуна тIар» тIисса, цала чивчусса балай уча увкуну. На рязи къавхъура. Учительнан хьинну къаччан бивкIуна. Га хъювсулну классравух за-



Шагьимардан Акниевлул душнищал Аьзизацал

нан ивкIуна. Яла цIувххуна: «Циванни вин къаччисса ттул балай учин?» На бувсссия, ттунма къабувчIлай бушиву вяркъу муксса архсса шяравун Къяннн циван лавгссарив, мунийр гъанну жул Читтурдал шяравалу дунура. Учитель хъювсулгу увкун, канихъсса аьсавгу полданийн къюч дуллаи, занан ивкIуна классравух. Яла, цакуну цирив дакИнин багъну, авцIуну, махIатталну цIувххуна: «Циванникъай вин, ттул хъьичIунсса дуснал ХIусайннул арснан, къабувчIлачIисса вяркъу Къяннн циван лавгссарив. «Къянн хьинну архсса шяравалур. Вяркъу – литературалул сипатри. Къянннал халкъ цуцIав къаукIлай, увкIсса инсаннах мюхтажсса, цу учIарчагу ххари шайсса агъали, хъамалу вяркъу бучIаврия ххарину, зюннав-дачIу ришлай бур, цулчIа къавтIун бизлай бур, циняв жанаварт балайрду тIий бур», – бувчIин бувна ганал. На учительнал бувсмунихгу вичIи дирхъуну, ялагу му балай къаучинна уча. Га балай ттун жагьилсса оьрчIал учин лайкъ бакъасса балайну чIалай бия. Классраву циняв пахъ багъну бия. Паракъатгу хъуну, учительнал цIувххуна: «Туну, ина ци балай учин ччай ура?» – куну. Бусав ттунма учин ччисса оьрус мазрайсса кIива балайлул цIа. «Даки балай тIутIиний» («Когда душа поет» ва «Шяраваллил чIарах» («Вдоль деревни»). Учительнал цIувххуна

на ми балайрду циван личIи бувссарив. Инсаннал даки мудар балай тIий дакИан аьркинссар, балайлул инсаннавун захIматрал ва талтаврив ххуллий гьунарду буллансса гъавас бутайссар, – бувчIин бував на цалчинмур балайлул хIакъираву. КИилчинмур балай, миву Дагъусттаннайн радио ва электричество дуркIшиву буслай тIий язи бувгъушиву бусав.

Ми гъантрай жул шяравун Читтурав электричество дурцуну дия. – Ва балай увкуну, ттулагу, шяравусса агъалиналгу ххаришиву бусан ччай ура, – куну, бувчIин бав. Учительгу рязи хъуна. Мукун, нагу, Шамил Каримовлулгу вай кIивагу балай увкуссар райондалул радиолувух.

Внушал ацIра шинал оьрмулуву бувсса гьалгъардавату чивчусса махъру ишла бувну буссар 2024-ку шинал итабавкъусса «Эшкъилул ххару» тIисса балайрдал жужрал хъьичIмукъу. Ттун пикри бур ванияр тихунмай Шагьимарданнун чичлачисса махъру ишла бан «Путь автора в поэтическом и музыкальном творчестве» тIисса оьрус мазрайсса цамур луттираву.

Га дия ттун 14 шин хъусса, Гьумучиял дянивмур даражалул школалий мйява класс къуртал буллалисса чIун.

Ттул буттал ХIусайннул, цала бутташал ХIасан-ХIусайннушалгу маслихат бувну, дявлия зана къавхъусса инсантуран чару

бишин аьркиншиву бувсуна шяраваллил жяматрахъ. Цувагу му гъайкалдануха зий улувкъуна. Ва давриву кумаг бан тавакью бувна Гьумучиял школалул директор, цала ссурахъу Ибрагьин Чалабовлухъу. Гъайкал дансса чару Кумиял шяраваллил чIаравсса карьердания лавсуна. Му бивхъуну буссия Гьумук, Ибрагьин ялапар хъанахъисса къатрал хIаятраву. Нагу бутташал уссияв бувгъусса, тия чулийсса Къячаев Оьмаханнул къатрай. Ца къини, Ибрагьингу, ппугу гъайкал дансса чару цIувчIлай бия. Гайннан шайсса кумаг буллаи нагу уссияв. Буттал ттухъ увкуну: «Мусиллай, ина лавгун бяричIисса райондалул библиотекалиин, хъунмунихъу кумаг ба увкуну, жула хIукуматрал цIадурксса шаэтурал шеърирдаву, дявлия ливтIуминнахасса, миннал чувшивуртту бюхттул дуллалисса бюхансса махъру лякъи гъайкалданый чичин», – куну.

Шиккува бусан ччива, ттунна цIа Къурбан дунура, Мусиллай циван учайсса бивкIессаривгу. Буттал ниттил Пахайл ттун дирзун дия дявлия ивкIусса арснал цIа Къурбан. Му цIа тIутIиний хъювсул дуклай, на ххира ан «Мусиллай» чайва. Яла му цIа ттуцIун ларчIун, цаймигу мукун тIун бикIайва.

ХIасил, хъуниминнал ттуинна дурсса вихшалдара-ягу ххари хъуну, хъунмасса хIаллай луттирдаву луглай, аьркинсса махъру лявкъуссия.

«Слава вам, храбрые, слава, бесстрашные, вечную славу поет вам народ, доблестно жившие, смерть сокрушившие, память о вас никогда не умрет». Вай махъругу чивчуну увкIра буттачIан. Буттан ми ххуй бивзун, ттуягу цIа дурну, чичинну вай увкуну. Яла ххи бувна: «Вай бакъасса, жунма чичин аьркинссар гъайкалданый лакку мазрайссагу махъру, ливтIуминнан, ятIатIар бакъа бакъа хъуминнан хас бувсса. Ина кIа хьинну гьунар бусса Шагьимардан Акниевлул хъьичIунсса ученик ХIсаврай, инава ляхъан бува лайкъсса махъру лакку мазрай». На му чIумалнин тачIав шеъри ляхъан къабувссия, буттал ттуява бивхъусса бурж биттур бангу хIадурну акъассияв. Хъиривмур къини, дарсирдая учIайхту, на шяивкIра зана къавхъуминнал виричививурттугу, миннал махъ ливчIисса мацца-гъанминнал дакIурдивусса асардугу, дардугу чIалачIи дансса махъру ляхъан буллаи. Бутталгу гай махъру, чан-къансса бакъин бавурттугу дурну, къамул бувна. ХIасил, буттангу, Ибрагьиннунгу ххуй бивзун, чивчуссар ми махъру Читтурав дявлия зана къавхъуминнан дирхъусса гъайкалданый. «Абадул абадлий, оьрчIал оьрчIангу, личIантIиссар дакИний зул чаннасса пикрирду, немец фашистная аьзисса Ватан дурочлай харж бувсса жагьилсса оьрмурду». Вай хъанахъиссар на цалчин ляхъан бувсса махъру.

Мунийр махъ, нава хъуна хъанахъисса кIаллай, ттула учительнашалсса ихтилатру дакИнин багълагъийни, махIатталну икIара, ттунма гьарзат бувчIлай бакъанугу, та чIумал учительная литературалул ва макъанну чиваврил дарсру лаласлай ивкIсса даражаллий. Мува Шагьимардан учительнал бакъаяв ттул бакIравунгу, дакИнивунгу буххан бувсса, инсаннал даки мудар балай тIий дакИан аьркиншиву. Танияр махъ, нава та чIумал учительнал чивчусса балай учин рязи къавхъуну ивкIсса дакИнин багъувкун, ттун мудар намус хъанан бикIай. ХIайп тIий икIайссияв, ххишала ттула ххирасса учительнашал хъунаавкъуну, ттуяра аьй хъушиврийгу мукIру хъуну, багъишлагу ити куну, ганаха хIурмат бан сант къашаврий.

Мунийн бувну, нудру бувну ивкIра, ливчIисса кIива нава чивчусса жужирдавусса балайрдан макъанну чирчуну махъ, ми итабавкъуну, презентация дуллалисса чIумал, нава чивчусса балайрдашал Шагьимарданнун балайрдугу учинсса сант рутан. Шинну нанисса кIисса, ттуцIа Шагьимарданнун буллаи ивкIсса захIматрал къимат хьиннува гъаз хъанай бия.

КицI лаган ччива, га Лакрал театрдану, Шагьимарданнун хас бувсса мажлисрай, лакрал ххаллилсса арамтурал, Дагъусттаннал Жяматийсса палаталул хъунаманал хъиривчу Сапарбаг Аьбдуллаевлул, жяматийсса ишккакку Шалласу Шалласуевлул ва чIявусса цайминналгу Шагьимарданнун увкумунишал, ганал лакку маз ябуллаи, жула культуралул даража гъаз буллаи бивхъусса захIматран бивчусса лахъсса къиматрашал нава хьинну рязину ушиву.

Га мажлисралгу, ганий бувсса ихтилатирталгу, гикку увкусса Шагьимарданнун мукъурттийсса ва макъаннайсса балайрдалгу, хаснува Гьумучиял искусствалул школалул дуклаки оьрчIал хор балай тIисса чIумал, шала зал бивзун, гайнацIун бахIаврилгу, жунна цинявнан барашинна дунни, ци даражалул инсан ивкIессарив Шагьимардан Акниев, цуксса захIмат бивхъуссарив ганал Дагъусттаннал культура гъаз дан, хъьичIуннай дан.

Утти ттун ччива Шагьимарданнун лакку маз ябуллаи, лакралгу, Дагъусттаннал культура гъаз дуллаи бивхъусса захIматран лайкъсса къимат бищаву мурадрай, ци давуртту дан аьркинну чIалай дуссарив, ттула пикри бусан, нава тIутIумуницIун рязисса цаймигу бухъувкун.

ХъьичIива-хъьичI аьркинну чIалай бур шаннагу лакрал районнал, Дагъусттаннал Композитортурал ва Чичултрал союзирттал, «Илчи» кказитрал вакилтал гьуртту хъусса ккурки стол батIин. Агана му пикри шаллу къахъурча, на ми иширттал хIакъиравусса ттула пикри «Путь автора в поэтическом и музыкальном творчестве» тIисса луттирай, Шагьимардан Акниевлул бусласисса разделдану аьлтту банна.

Къурбан КЪУРБАЛОВ, ш. Читтур

Республикалий дайдирихъунни патриот акциярду

Шикку гуртту хъунни Дагъусттанал Хукуматрал председателна хъиривчу Муслим Теляков, жагьилтурал иширттал министр Камил Саэдов, КИулшивуртту дулаврол ва элмул министр Яхия Бучаев, мукунма жагьилтурал жаматийса суккушиннардал активисттал, дуклаки оьрчру, влаьстрал органнал ва шагьрулул администрациялул вакилтал.

Аьралий оркестрданухун кьукьа ларгунни шагьрулул Хъун майданни Лениннул Комсомолданул цанийсса паркравусса Аьралийчунал гьайкалданучан. Нани ххулий акциялул гуртгучитурал дирхъунни тIутIив Совет Союзрал Виричу МахIаммад ХIажиевлул гьайкалдануцI. Аьралийчунал гьайкалдануча хъунни шадлугьрал митинг. Минутрайсса пахь багъавугу дурну, гьайкалдануцI ва Савлугьрал Аллеялий дирхъунни тIутIив. «Вахта Памяти» акциялия дайдишинтIиссар луглагавуртту, хъиривлявуртту дуллалисса сезон, талатавуртту най диркIсса кIанттурдай зун байбишинтIиссар экспедицияртту.

Вара кьини республикалий дайдирихъунни акция «Георгиевская ленточка», зун бивкIунни «Цалчинминнал Суккушиннардал» «Пост №1». Патриот мероприятиярттаву гуртту хъун тIий бур чIявусса жагьилтал.

МахIачкьалалив, Лениннул цанийсса майданни, дайдирихъунни Буттал кIанттул цанийсса Хъунмасса дяввий Ххувшаву ларсун 81 шин шаврин хас дурсса республикалул акция «Вахта Памяти».



триот мероприятиярттаву гуртту хъун тIий бур чIявусса жагьилтал.

КIицI лаган, «Вахта Памяти» акция МахIачкьалалив дакъассагу, наниссар республикалул районнайгу. Ванийнугу чIалачиссар бьхттулсса Ххувшаву ларсми жунма дакIний бушиву, миннал чувшиву никирая никирайн най душиву ва

жува циняв Ватан ххирашиврул, жула тарихрачIансса Хурматрал цачIун буллай бушиву.

Вара кьини дайдирихъунни «Пост №1» патриот акциялул гуртгучитал бацIантIиссар вахталий Буттал кIанттул цанийсса Хъунмасса дяввий ва хасьса аьралий операциялий жанну дуллуминнансса гьайкалдануча. Акция «Пост



№1» наниссар «Хранители истории» тIисса «Цалчинминнал Суккушиннардал» проектрал лагурий. Дагъусттанал циняв шагьрурдай ва районнай акциялул гуртгучитал гьарица кьини бацIантIиссар пострай апрель зурул 23-нния байбихъуну майрал 9-ннийнин ссят 12-нния 15-ннийн бияннин.

МахIачкьалалив «Хранители

ли истории» проектрал гуртгучитал бацIантIиссар кьаралданый Лениннул Комсомолданул цанийсса паркравусса Аьралийчунал гьайкалдануча.

Цалчинсса кьини вахталий бацIан вихшала дунни генерал-полковник Г.Н. Трошевлул цанийсса Дагъусттанал 1-мур кадетьтурал корпусрал оьрчIайн.

Анриана Аьбдуллаева

Къучагънал аьпалунсса турнир



ЦIуссалакрал оьрчIал ва чIава жагьилтурал спортрал 1-мур школул (ДЮСШ) залдану хъунни хасьса аьралий операциялий чувшиврий жан дуллусса Рамазан ХIасановлул аьпалунсса чIава жагьилтурал дянивсса дзюдорал райондалул турнир.



Ва хъунни чIава спортсментуран сала гуж, хIал ххал бигьаврицIун, яхIирал дарснугу. Рамазан абадлий дакIний икIантIиссар вайннан Ватандалул мурадру буручлай, жандалий хIайп къаувкусса къучагъну.

Турнирданийн спортсментал

барча бан ва къучагъ дакIнин утан бивкIун бия чIявусса бусравсса хьамал: влаьстрал ва диндалул вакилтал. Бия къучагънал кулпат, оьрчру, ссурвал, дултал. БивкIун бия мукунма Рамазанушчал къуллугъ буллай бивкIми, цачIу талай бивкIми. Турнир тIитIлай, гуртгучитал барча

бунни республикалул бакIчинал советник, «Каспий» батальондалул командир РахIим Нурмухановлул.

Ихтилатру бунни Буйнакскаллал райондалул бакIчинан КIанайсса «Каспий» батальондалул комбат Табир Маликовлул.

– ХIакьину шиккун, ва бьстччалливу гуртту хъун, хаварбакъулий агьсса цучIав акьассар. Зу, ялун нанисса Ватан дуруччултру. ДакIний битияра, цила икIайкунсса талатала муттаэнаяр ялтту увккун ларьсса ххувшаврийнунир, сала мукъуйн ва жаматрайн тIайлашиврийну чIалан икIайссар, – увкунни вана. ЦIуссалакрал шяраваллил бакIчи Рамазан Сулаймановлул, КИулшивуртту дулаврол управлениялул методист Мисиду Шахмандаровал кIицI лавгунни Рамазаннул чувшиву, ватан ххирашиву ялун нанисса никирайн эьратну хьанахьшиву.

Гуртгучитурал виричунал аьпалун минутрайсса пахь багъаву дунни.

Яла байбихъунни бьстччал. Дзюдо – ва бур ссавур ва къян-

къашиву тарбия дуллалисса спорт. Вай хасиятру ккаккан дурссар Рамазаннулгу Ватандалул мурадру буручлай.

ХIажимахIаммадлул арс Рамазан увну ур 1983-ку шинал январьданул 11-нний ЦIуссалакрал райондалийсса Чапаевкалал шяраву.

2024-ку шинал контракт чирчуну, хасьса аьралий операциялийн Ватандалул мурадру буруччин лавгун ур. Рамазан ивкIун ур саперну, битуну ва водителну къуллугъ буллай. Цалчинсса контрактрал чIун дурккун махь, кIийла ялагу лавгун ур. Махьва-махьсса аьрххилий, контракт чирчуну кIира нюзмардува, 2025-ку шинал октябрь зуруй, жан дулуну дур. Ва лайкь хъуну ур Къучагъшиврул ордендалун, «За Отвагу» медальданун, мукунна ванан дулуну дур «Дагъусттанал халкъуннал виричу» тIисса ца.

Рамазаннул махь ливчIунни кулпат, шанма оьрчI. Ва ия нитти-буттал ца акьа акьасса арс, шанма ссийл ца уссу.

Анриана Аьбдуллаева

Апрельданул 26-нний ччалли дурккунни А группалул 3-мур турданул командартту.

ЧIайннал ва Хьурхьрал командартту ччалли дурккуну, царагу ххув кьархъунни, счет хъунни 2:2. ХьхьичIунма тIуркIучину ккаккан унни Давид Аьлиханов. Мува группалул бьстччалгу къуртал хъунни Хьюйналл ва Ххутрал 2-мур командалул дянив, ххув хьумур команда кIулдан кьархъунни, тIуркIуллул счет – 3:3. ХьхьичIунма тIуркIучину ккаккан унни НурмахIаммад ХIажиев.

Лакрал Кубокрал тIуркIурду

Д группалул 3-мур турданий ГьунчIукьатIрал 2-мур команда ххув хъунни Карашрал 2-мур командалуяр. Ва командалул дур группалува дуккавийнсса шанс. ХьхьичIунма тIуркIучину ккаккан унни Амир Ибрагьимов.

Вава группалуву ччалли дурккунни ЦIуссалакрал ва ЧукIуннал командартту 4:3 счетрай. ХьхьичIунма тIуркIучину ккаккан унни Сайпу Гаммацаев.

Вава группалуву ччалли дурккунни ЧИтурдал ва Чурттащиял командарттава ЧИтурдалсса ххув хъунни 2:0 счетрай. ХьхьичIунма тIуркIучину ккаккан увну ур Маллааьли Кьурбанов.

Е группалул 3-мур турданий ччалли дурккунни ЦIуссалакрал ва Ялув ЧIатIлухьиял командартту, Ялув ЧIатIлухьиялсса ххув хъунни 4:3 счетрай. ХьхьичIунма тIуркIучину ккак-

кан унни Аятуллагь ХIажиев.

С группалул 3-мур турданий Карашрал команда ххув хъунни Ккуллал 2-мур командалуяр. ХьхьичIунма тIуркIучину увчIунни ХIажимурад ХIусайнов.

Вава группалуву ччалли дурккунни Уручуллул ва Дюкьуллул командартту. Минниату Дюкьуллул команда ххув хъунни 2:1 счетрай.

Хьинну хIазсса дикIантIий

дур С группалул ахир. Матчрал хьхьичIунма тIуркIучи хъунни Сажид МахIмудов.

В группалул 3-мур турданий ччалли дурккунни Уручуллул ва ДучIиннал командартту 2:2 счетрай. ХьхьичIунма тIуркIучинан ккалли унни Нариман Рамазанов.

Вава группалуву ччалли дурккунни Ккуллал ва Кьукуннал командартту. Ккуллал команда ххув хъунни 5:1 счетрай. ХьхьичIунма тIуркIучину ккаккан унни Аьли Оьмаров.

ХIасан АьДИЛОВ



Юбилейран хасну

Барзул гъава



АДАМ АДАМОВ

Дазу-зума дакъасса
Буллугъсса дуняллий,
Гъарца рухI дусса затран
Цинна аьркинмур лякъай,
Цинна хас дирзуничан
Гъарца затгу кIункIу шай:
Аврду – бюхттул зунтгачан,
ОьрватIив – кунцIуллачан,
ЧIимучIали – чанначан,
Ччиккумявртту – цIанначан.
На тIурча ттунна дурчIав
Тархъаншиву, лахъшиву,
Эшкъи-ччаву, дусшиву,
МарцIшиву, тIайлашиву,
Лайкъсса захIмат ва тIутIив...
Вай ххуйшивуртту дурчIав,
Нава инсан уну тIий!

На бюхттулну лехлан
Барзу акъаяв,
Вих эшкъи хьуну махъ
Ттуй хъару хьунни.

Шавкъирай балай тIун
Булбул акъаяв,
Вих ччаву хьуну махъ
На аьшукъ хьунна.

Ва ттул дикIул дакIу
Марша дакъая,
Ина ххал хьуну махъ,
ТIутIайх дирчунни.

Барчаллагъ тIий ура
Вил нитти-буттахъ,
Ина кунмасса душ
Хьунма бан хьусса.

Къукъухъхь кунма, ххуйсса
Бархъаллал къукъулуву
Дия ца хьункIултIутIи
ЧIатIу литIлай, меж дикIлай.

Хъякусса га къукъулий
ХIайп тIутIими чIявуя,
Амма къакълайсса тIутIуй
Язугъ банма акъая.

ВацIилул хъачIнихату
Буккайсса дюхлусса марч,
Маршурдайх экъигайни,
На дакIнин къаагъайрив?

ТIуруву тIуркIу тIисса
Дяркъу щинал шараший.
Щамарахъ шуршу байни,
Ттул ца кIицI къадуварав?

Ардарав кIутIу тIисса
Хъахъи гуламан тIутIий,
Интишал дакI дачIайни,
Ттуйн ссалам гъан къабарав?

Буршах ххарарал къяртлуи
БалайтIи чIиви чIелмуй,
Гъинтнил чанна бургъиха
Ттул балай къаучарав?..

Дюхлусса марч, шараший,
ЧIиви чIелмуй, гуламан,
Нава чув-ухурчагу
Даки дур зушал даиман.

Маршурдай, тIивтIу суннай
ЧIиникI бишай оьрчI-вирттал,
Нава щичIа унугу,
Пикрирду зуя бикIай.

Фермардай, мюрш хъуруннай
Зузисса душру-хъамий,
Нава ци зий унугу,
Щугълурду зуя бикIай.

На дуняллийн увккукун,
Даххана къархъуна цичIав.
ЧIатIисса оьрчI ина бувкун,
Ххаригу къавхъуна цучIав..

Аммарив вичIан ийяхту, –
Ттул пашман дакI ххари хъуна,
Амма, ина пиш учайхту, –
Дунял даххана хъуна!

Яру тIутIайн бияйхту,
Чанна гъи дакIнин дагъай,
Щарашал чIу баяйхту,
МарцIшиву дакIнин дагъай,
КIинттул цIарайн яшайхту,
Ччан дикIай гъилишиву.
ЧитIул балай баяйхту,
Дакинин дагъай шадшиву...
ТIутIал дулай ххуйшиву,
НякI шарашал – марцIшиву,
Ярг цIарал – гъилишиву,
Шадшиврул – тархъаншиву...
Ина, ккаккайх, дакIнил дус,
Духхай ва ттул дакIнивун
Имин тIутIал ххуйшиву,
Ляхъ маршурдил марцIшиву,
ЛяличIисса шадшиву.

Бачияра, дустал, Лаккуйнмай гъанну
Жула магъмун дакIру гъарта дуванну,
Мотордал гургулуд дашан дур вичIив
ВерчIичIул макъаннай

аьчух дуванну.
Мах-порунтрал пIяйлул цIуци був яру,
Щюли маршрал хъхъемай

шошлай хьин банну,
Буруккин-дардирдал сакъат дур дакIру,
ХьункIултIутIайн ссунтI тIий,
сагъ лаган данну.

ЧIун хьун дуранура жиг дартI лажинну,
РатIал щин шун дурну,
жагъил дуванну...
Дараччул дарайлул лаххия ларххун,
Бюрчурттахуртту бур жухва ялугълай.
ЛухIуваллул тик бивкI

бизанттуин лавхъун,
Уздансса бархху бур лагма буруглай...
Буттал утта хъачIрайн чIивитIу куна,
ПпабакIул бакIавун жува лахъанну,
ЩупартIи ттуруллайн

хъазам шун банну,
Хъямала багъанну тархъансса мурчайн,
Ччамарду буванну неххал айгъурдай!..
Да, бачи, да, бачи, бархху оьвтIий бур,
Хъанай бакъар утти ттуца дан ссавур,
Ттушал ачинтIиссар яла учIима,
Тархъан барзул хъару хъачIунттай дума!

Буттал шяраву

Ттуршва шарашуя на щин хIарчIиссия,
Мякъмур цаннилвагу къабувна лиххан...
Так ттуршлий цалчинмур

шарашул щинал
Тяхъа-шад дуруна хханххираву дакI.

На ттуршва маршая тIутIив дурссия, –
Миннул, яру бакъа, ххари къабувна.
Так ттуршлий цалчинмур
маршайсса тIутIал
Лагъ дурна, ахирдан, дакIнивусса цIу.

Му марша шуршу тIий
буссар ХъурукIрав,
Маршалугу дуссар шарашул шарав.

ХIухчу

Ттуршайх ттурлугу ларххун
Ттурзаннун ххют хьуншиврул,
Бюхттул зунттайх, бизанттайх
Ина най ура, хIухчуй.
КIяла яттил ттурзанну
Вил хъхъичI най бур иминну,
Миннул хъирив мютIину
ЯтIул гада-баргъ най бур.
ЯтIул гада бувххунни,
Зунттул хъачIних ливчIунни,
Га зана хьунтIиссарча,
Пикри мабара, хIухчуй.
Вил виргъангу, шанугу –
Чурчари аьнди варси,
Ина гъили бувара
Миву баякъусса чIиру.
Аьтрилул къанкъ ду арду,
Арцул щин дурк бизантту,
Вил тавхантту бур, хIухчуй,
Укъахайсса виричуй.

Ци хIасрат, ци дардру дакIний дунугу,
На аьчух уккара, вин я шун барчан.
Цукссава мискинну нава унугу,
Давлатлул шара на, вил чIу баярчан.

Вил тIюнгъасса яру ттухва бурувгний –
Бургъил лагма лавгсса

цIуртти ттун ккаккай,
ХьункIултIутIал мурччал
ттухва пиш куний –
ТалихIрал лелуххи ттул хъачIрай ликкай.

Цавагу эшкъилул жужрай бакъасса
Караматсса хавар вил пишлил бусай.
Цаягу шаэрнал дакIний дакъасса
Аьламатсса назму яруннил дуккай.

Вил яруннил бувсмур
ттул дакIнин бувчIай,
Ттулминнул тIутIимур

вин цан къабувчIай?
Вил пишлил увкумур, душ, ттун асар шай,
Ттулмунил увкумур вин циван къашай?!

95
ШИН

Пана дуняллийх вих луглай, занай,
Аруллайра усру ттинин тIатIав на.
Агъ, ахIмакъ, циванья на архну занан,
ЧIарав чIаххуврайва бунува ина.

Хъус-ххазина лякъин хIарачат буллай,
Къидир бав чIявусса на вай шагъурду,
Амма ххазинамур чIарав бивкIун бур:
Тархъансса зунттурду, тIиртIусса арду.

ТалихI лякъинна тIий,
тийн-шийн хъапа тIий,
ТалихIмур бивкIун бур буттал шяраву:
Ухханнин тяхъану дурсса давриву,
ЧIаххул ва чIаравми ххари бавриву!

Агъссарахха на никирттайн,
Агъссара...
Сси къабакъай
Щарашал някI турлил хъхъичI
Агъссара.

Дургъуссаркъай на бакI ссука,
Дургъуссар...
Ссавнийн щусса,
Чаннасса барзунттал хъхъичI
Дургъуссар.

Ивзрав!


Гъалак дурну Щунуйсса сун,
Хъусрал маршая къанкъ ларсун
ТтулчIан дуркIсса куклу чIаракIлуй,
Дирзрав!

ХIаллил гъанав тIанкIа тIисса,
Ниттийн бакъа къамютIисса,
Вила ххютлин къанктIи, гъинтIул оьрчI
Бивзрав!

Ттурзаннан ххют дур ттуруллайн
Чул бившуну авцIу Суллай,
Шавкъирай ппеллу бишай Суллай,
Ивзрав!

ЧIу-чIитI бакъа къакъалуву –
НувчIа чарил къакъарттуву
ЛадиркIсса вайливсса вьвтIивалт,
Дирзрав!

– Ивзрав!!
– Ивзрав!
– Ивзрав...

Лажин хIадур дурссар
Р. БАШАЕВЛУЛ

ш. ХъурукIул

Дагъусттаннал орфографиялул конференция

Ва хъуннасса агъамшиву дуса элмийсса мероприятул сакиншинначитал бия Дагъусттаннал КИулшивуртту дулаврил ва элмулул министерство, Дагъусттаннал федерал ахттаршиннарал центр (РАН). Конференциялул мурад бия миллатирттал мазурдил норматив база цIу буккан баву ва чичрулул къяйдарду лингвистикалул элмулул ххулийсса агъамса хъхьичIуннайшивурттацIун дархIуну дакин даву. Дагъусттаннал мазурдиву махъру чичаврил къяйдарду цалин дурцуну, лакрал, яруссаннал, лазгийл, даргийл ва цаймигу мазурдийсса учебный, художествалул ва периодикалул литературалулу личИ-личИну чичлачисса махъру ца кушуй чичаврийн бивкIун, орфографиялул правилардал сса свод цIакъ даву.

Конференциялий гуртту хъунни Дагъусттаннал КИулшивуртту дулаврил ва элмулул министрвалул вакилтал, мазраха зузисса элмийсса зузалт, педагогтал, журналисттал, мазрал эксперттал. Мероприятие тIитIлай, ихтилат бунни Дагъусттаннал КИулшивуртту дулаврил ва элмулул министр Яхия Бучаевлул.

– Терминнал ва орфографиялул комиссиялул даврил хIасиллайн бивну, центр зун бивкIссар яруссаннал, лакрал, даргийл, табасараннал, лазгийл, къумукънал, агъуллал, рутуллал, цIахурдал мазурдинсса цIусса орфографиялул правилардал сводру сакин давриха. Ва школардай ниттил мазрал дарсру дишаврил тагбар ххуй даву мурадрайсса чара бакъа аьркинсса давур, – кIицI лавгунни ванал. Пленарный заседанилий мукумма ихтилатру бунни Дагъусттаннал федерал ахттаршиннарал центрданул (РАН) директор, академик Акай Муртазаевлул, Мазрал, литературалул ва искусствалул институтрал (ДФИЦ РАН) каялувчи, филологиялул элмурдал доктор Абусупьян Акамовлул, вава институ-

МахIачкъалалив, XI.Цадассал цIанийсса Мазрал, литературалул ва искусствалул институтрал (Дагестанский федеральный исследовательский центр Российской академии наук) конференц-залдану хъунни «Своды орфографических правил по языкам народов Дагестана» тIисса Шалагу Дагъусттаннал VII орфографиялул конференция.



трал отделданул хъунама Хизри Юсуповлул, вава институтрал чIивимур элмийсса зузала Аьйша Гаммакуевал, Терминнал ва орфографиялул комиссиялул циняв мазурдил зузи группардал каялувчигу. Ххал бивгунни орфографиялул реформардал хIакъиравусса пикриду. Дагъусттаннал халкъуннал мазурдил орфография цIу дуккан даврил мурадрая ва багъана-саварттая бусласисса, Республикалул терминнал ва орфографиялул комиссиялул дурмунил хIасиллу дуллалисса ихтилат бунни Хизри Юсуповлул.

– ЧIун нанисса кса цумурцагу маз, мукумма Дагъусттаннал халкъуннал мазругу, баххана хъанахъиссар. ЦIусса шартIирдайсса мазрацIун дакълай, даххана шайссар орфографиягу. ХъхьичIва жула республикалий чIун-чIумуй (10-15 шинай цал) ххал диргуну, цIу дуккан дайссия орфографиялул правиларду. ЧIярусса шинну ларгун дур ва даву къадурну. ЦIанасса Дагъусттаннал мазурдил орфографиялул

сводру дур 1979-ку шиналласа. Махъра-махъсса дахханашивурттая цIанассануин биянин сайки дачIи тIуршукуксса чIун ларгун дур. БувчIлачIисса зат бур, му чIумул манзилданий фонетикалулу, морфологиялулу, лексикалулу чIалансса дахханашивуртту хъушиву. Ми цIакъ дан багълай бур цIусса орфографиялул сводраву. Мунияту хъинну аьркинну дия цIанасса орфографиялул къяйдарду цалин дучаврил даву дан. 2025-ку шинал ссуттихунмай пишакартал байбивхъуна орфографиялул правилардал сводрал проектрах зий. Сакин бувна цала-цала мазурдикх зунсса хъасса группарду. Зий бия урчIва группа: ряхва чичрулийну бусса мазурдикх (яруссаннал, лакрал, даргийл, къумукънал, лазгийл, табасараннал) зузисса, шанма махъсса шиннардий чичру ларъсса (агъуллал, рутуллал, цIахурдал) мазурдикх зузисса. Цинявпапу группардал вакилтал чялишну датIлай бия материал, ришлай бия цала хIадур дурсса проекту миллатирттал кказитирт-

тай. Миннул хъунмасса аваза бивтунни ниттил мазрал дарсирдал учительтурал, преподавательтурал, аьлимтурал ва жяматрал вакилтурал дянив. Цинявпа группардал хъуннасса даву дунни литературалул мазрал орфография цIу дуккан даврил ххулий. Так пишакартурал-лингвисттурал, учительтурал, журналисттурал ва жяматрал аьмсса хIарачатрайнур жушав жула мазурдил марцIшиву ва аваданшиву ягу дурну, хъирив нанисса никирттайн диян дан хъунтIисса, – увкунни ванал. ЦIусса правилардаш чIявуссанаща КIул хъун бюхъаншивурл электрон ресурсру, масала, онлайн-словарьду баву хъин чулий ккавккунни ихтилатчигу. Гъаз бунни мукумма ниттил мазрал дарсру дишаврил къяйдардал, цIусса, ххисшалану мунопат бусса методикартту зузи даврил, педагогтурал даража гъаз баврил масъаларттугу.

Лакку мазрал орфографиялул правиларду цIу дуккан даврил хIакъиравусса ихтилат бунни Аьйша Гаммакуевал.

Пленарное заседание къуртал хъуну махъ дайдирухъунни цинявпа мазурдил секциярдал даву.

Лакрал секциялул заседанилий гуртту хъунни Терминнал ва орфографиялул комиссиялул зузи группалул, лакрал шаннагу райондалул вакилтал. Секциялул даву тIитIлай, Аьйша Гаммакуевал бивсунни лакку мазрал хIакъиравусса Терминнал ва орфографиялул комиссиялул зузи группалул уттинин орфографиялул масъалартту ххал бигълагисса ххюра заседание хъушиву, хIакъину цалин дурцусса свод къамул дантIшиву. Лакрал алфавитрал ва орфографиялул правилардал сводрал проектрал хIакъираву циламур пикри бивсунни филологиялул элмурдал кандидат, профессор Роза Эльдаровал, кIицI лавгунни проект 1993-ку шинал цIанихсса лингвист, профессор

Ися Абдуллаевлул сакин дурну диркIшиву. Зузисса группалул ва проектраву цаппара дахханашивуртту дунни. Масала, алфавитравун дичин кунни кIилийнусса хIарпру (кк, хх, пп ва м.ц.) ва мукъра хIарп дусса хъхъ. Вай хIарпру ишла дуллай бунугу, алфавитраву личИну, цайнура цирда (самостоятельную) ккаккан дурну дакъассия.

ХIасил, уттинин диркIсса цаппара правилардаву дунни дахханашивуртту, цаппара махъру чичаву цалин бивцунни. Вай дахханашивурттая балжину къачичланна, свод цурда ришунссар кказитрай. Филологиялул элмурдал доктор Хизри Ильясовлул ихтилат бия лакку мазрал грамматикалул хIакъиравусса. А.А.Тахо-Годил цIанийсса Дагъусттаннал педагогикалул научно-исследовательский институтрал ниттил мазурдил секторданул хъунмур элмийсса зузала Светлана Мутаевал бивсунни лакку мазраву КIива-шанма журалий чичлачисса мукъурттая ва язи дургъумур варианттая. Масала, кIилийнусса цIарду комиссиялул зузи группалул лавчIун чичин увкунни (Аьлибугта, МахIаммадрасул).

– Орфографиялул хъунмасса бияла буссар миллатрал культура ва мазрал ляличIшиву ядавриву. Чичрулул кодекс бушиву маз ябаврил агъамсса шартIну хъанахъиссар, – увкунни ванал, ва цила ихтилат къуртал буллай барчаллагъ увкунни ва давриха зий бивкIсса Терминнал ва орфографиялул комиссиялул, лакку мазрал учительтурахъ, лакку мазрай чичлачисса журналисттурахъ, маз ябаврил ялул дакI цIуцIаву дуллалисса цинявнахъ. Цаламур пикри бусласисса ихтилат бунни шаэр Алексей ХIажиевлугу.

Дахханашивуртту дурну итадаркъусса орфографиялул правилардал свод «Илчи» кказитрайгу ришунтIиссар.

Анриана АБДУЛЛАЕВА



Исмаил Къандаев, Майкопрай Чернобыллайн ачин хъхьичI

Чернобыллай вирттал

Жула биялатрал тарихраву, байраннацIун, пишакарсса кьинирдацIун, къачансса дур гъарца шинал кIицI лагайсса пашмансса кьинирдугу, датардугу, вайннувацца цагу – апрельданул 26-мур кьини. 1986-ку шинал Чернобыллай АЭС-рай пIякъ учаву хъусса кьини. МахIачкъалалив С. Стальскийл паркраву хъунни ва балапатI хъуну 40 шин шаврицIун дархIусса дягъулул митинг.

Ваний гуртту хъунни МахIачкъала шагърулул депутаттурал мажлисрал председатель Хиби Аьлиев, шагърулул бакIчинал хъиривмур Эмилия Раджабова, шагърулул Культуралул управлениялул хъунама Фарид Абалаев, «Дети Чернобыля» союзрал председатель Зугъра ХIалимова ва чIявусса цаймигу. Митинграй гуртту хъанахъиминнавугу яла бусравмину бия ларгсса тIуршукулул овккими ва нигъачIими иширттал цану

тарихравун бивхсса Чернобыллай катастрофалул биян бивсса зараллаштал талай бивкIми цивппа.

Шагърулул бакIчи Жамбулат Салавовлул цIания бавтIминнал хъхьичI махъ лахълай, Хиби Аьлиевлул увкунни:

– ХIурмат бусса дустал. Ванияр мукъцIалла шинал хъхьичI хъусса хъунмасса балапатIрал дурсса шаву мундугу личIантIиссар жулла дакIурдиву. Чернобыллай АЭС-рай хъусса балалул ликвидатортураву бивкIссар Дагъусттаннаясса 3 азаруннийн бивсса инсантал. Жу зулгу, зу дурсса чувшиврулгу, цалва оьрмурду инсанит ххассал даврил цIаний харж бивминнал аьпалулгу хъхьичI бакIру къус диглатиссару. Зу хъанахъиссару махъа нанисса никирттанса чувшиврул ва виричувшиврул эбратну. Ча тIий ура цинявннан някIсса ссав ва оьрмулул лахъисса шинну, – увкунни ванал.

ЛивтIуминнал аьпалул

минутIрайсса пахъ багъавугу дурну, радиационный апатIру ва катастрофарду сававну оьрмулува лавгминнан дацIан дурсса мемориалдануцI тIутIив дирхъунни. Митинграя махъ тIивтIусса ссупралуху хъунни тай ишру, оьрмулува лавгсса ветерантал дакIнин бичлачисса ихтилатру.

Митинграй ия Чернобыллай АЭС-рал пIякъ учаврил биян бивсса зараллал ликвидатортураву, биялат радиациялия бурчлачиминнавух ивкIсса, Шахъуйннал шяравасса Къандаев Исмаил МахIаммадлул арсгу. Совет Союзрал личИ-личИсса кIанттурдаясса инсантураву Исмаилгу га чIумал, ца зуруйсса Майкопрай «учебкалийгу» ивкIун, лавгссар Чернобыллай. Цалва бакIрачIан бучIанмур, ва аьрххилия махъсса цалла цIуллу-сагъшиву, оьрму цумур чулухунмай КIура баентIиссарив къакIулну, вай лавгссар бачIва хъусса, «ливтIусса» шагърурдайн, лагма-ялттусса гъарца зат,

хIатта ласласисса ссихIума, загърусса кIанайн, чIалакъачIи «душманнашал» талан. Талангума цукун аьркинссарив, ци дуллан аьркинссарив бакIрайва шинкIуй КIулну къабивкIсса, ярагъну канихъ так дозиметрду диркIсса. Исмаил Чернобыллайн гъаннингу армиялий къуллугъ буллай ивкIссар Совет Союзрал КИлчинмур испытательный полигонну хъанай бивкIсса Семипалатинскалий. Цалва хъхьичIмур къуллугъгу ядерный ярагъунницIун бавхIусса бухъувкун, ватандалийн кьини дурксса чIумал, лавгссар Исмаилгу, ва кунмасса цаймигу цалва кумаг аьркиннийн. Амма, жунма КIулсса кушуй, вайннахмур къулагъасрив Совет Союз лирну махъ хъинну чан хъунни. Я цIуцIавуртта, я цайми захIматшивуртта къабурувгун, ичIуваминнангу, махъсса цайминнангу эбратну къанкъа дурну оьрму бутлай бур вай.

Бадрижамал АЬЛИЕВА

Цалчинсса телевизор ва артистътал



Гьарун Саэдов

Лакрал театр данул артист Динмахаммадов дакӀни агьувкун, ттун ччан бивкӀунни мунацӀун бавхӀуну, та чӀумалсса театр дания ва телевизор дания чичин. Телевизор циван хӀала буллалиссаривгу гихунмай бувчӀинтӀиссар.

На дарсирдайн ачин уваса чӀун дия. Ттуннагу ряхра шин хьуну, арилчинмур шин дайди хьусса 1967 шин, Ваччав яхъанайсса чӀун. Бутташал Хамидлушал лавгру площадрайсса хьун ттучандалийн. Универмаг тӀий, тиву мадара личи-личисса кьайкьуй дахлай дикӀайва. КӀия ттучанчигу ия. Ттун гивун увхсса чӀумал, та ттун циривгу кьакӀула, мукьмурцӀусса ящик итталун багьуна. Танийгу миакрангсса пюрун бия. Танни хьхьичӀ авцӀусса чӀумал, дагъанттувух куна чӀалан икӀайва инсанннан цува. Буттал: «Ва телевизор цалчинсса бур шикку, жунма машин ласунну», – куна. Цаппара гъантрава буттал машин лагу-лавсуна та телевизор: «Рекорд 67».

Багъа дакӀний бакъар, дакӀний бур буттал шала харжи таних буллусса. ТелевизордануцӀун антеннагу аьркинну дия. Антенна даншиврул бучӀи льякьуна буттал хьхьичӀва подписка дурну бучӀан байсса «Радио» тӀисса журнал. Журналлай чивчумуния кӀулну бикӀайва Ваччав яхъанайсса Ахъаев Рамазанун ва ХӀажиев МахӀаммадлул. Му «Радио» журналданий бия чивчуну, суратругу дирхьуну, цукунсса антенна дан аьркинсарив. Антенна цурдагу дециметровыйри тӀий бусли бия. Дувсилул ххалу, кӀюласса турбарду лавсун, ми кьалайлий кунуцӀун кув лачӀун бувну, дурна антенна. Телевизорданул вышка Гьумук дуссар тӀий бия.

Антенна дурну зун бивкӀукун, телевизорданувух оьрчӀансса муьлфильму най дия. ДакӀнийри, лисапитӀрай бигьлагьисса, ца мюти акьасса оьрчӀ ххал уллай. Му дия оьрчӀру тарбия бан кунна дурса.

Цаппара гъантрава хавар бувккунна телевизордавух Лакрал театр данул пьеса ххал бантӀишиву бусласисса, цуппагу Ваччаву революционер, Петербуглив дуклакисса Гьарун Саэдовлуясса.

Ваччав райцентр даний ВкӀулма-кьакӀулма муния хавардай бия. Шаппа телевизор бур-



«Кречинскийл хьати». Динмахаммад Динмахаммадов, Дагьусттаннал халкьуннал артист ХӀасан Буттаев



«Барзу» пьесалуву генеральнал роль дургьусса Серго Хайдакьов, АхӀмад-Хан Султаннул роль дургьусса Динмахаммад Динмахаммадов



«Барз бувгьусса хьхьу» пьесалуву роль дургьусса Динмахаммад ва Жинасат Динмахаммадовхьул

хьувкун, чӀявусса инсантал ччай бия лакку мазрай гьалгьа тӀисса пьеса ххал бан бучӀан. Бутталгу пикри бувну, чӀявусса халкь кьагъансар, чӀавахьултӀий бивхьуну, телевизор хьовун бурган банну куна. Мукун бугу-бувссия. Шайссаксса лахьну гьалгьагу тӀутӀи бувну.

Жу га чӀумал яхъанай буссияв Ваччав, центр дания арх бакъа. Кьятлул заллу бия Загьра тӀисса. Заллухьру цивппами ялавай лавгьсар тӀун бикӀайва. Ттун дакӀний бакъар ми чув зий, яхъанай буссияв. Ставропольайри учайва.

Пьеса бусса кьини ахттая



Гьарун Саэдовлул роль дургьусса Динмахаммад Динмахаммадов



махъ хьовун бавтӀуна буцири халкь. Цашалва шябикӀансса кӀантту-кьатӀри лавсун бивкӀун бия.

Пьесалуву Гьарун Саэдовлул роль дургьуну ур Динмахаммад тӀий баян бувна.

Пьеса кьуртал шайхту, циняв лавай бивзуну, тассатанингу хьатру ришлай бия. Та чӀумал Гьарун Саэдовлул роль дургьусса Динмахаммад цинявннан дакӀний ливчӀуна, ванал цӀа ларгуна.

Ттунма дакӀнийри, та пьесалуву оьрмулул гьварасса артист дяввай Гьарун Саэдовлуин. На буттахъ ура цӀухлай: «Та циван дяввай ур танайн» тӀий. Буттал увкуна: «Та угьарама Гьаруннул (артист Динмахаммад) буттар хъанайсса» куну. Гьарун Саэдовлул буттал роль дургьума артист цу уссияв дакӀний акъар. Халкьуннал артист ХӀасан Буттаев ухьунссия тӀий ура. Гания махъ цуппа театругу бивкӀун, шяраллавуугу ххал буллай буссия пьеса.

Ттунма дакӀнийри, клубиртаван театр ххал бан кьабувкӀми оьрчӀал кьатӀув цаламур театругу бикӀайва куннашал кув бивну.

Ва макьала чичинсса ишгу мукун хьуна: Москвавив кӀулсса лаккучунашал ихтилатрайсса чӀумал, артистьтурал царду дакӀнин дичлай, ца цӀа дакӀнин кьадагьлай дия. Нагу учав, му Гьарун Саэдовлул роль дургьумавагу акъарив куну. «Ди-ди,

муна му Динмахаммадри», – куну, ттул ихтиварнан дакӀнин агьуна.

Нава Москвавив институтураву дуклакисса чӀумал, 1980-ку шинал дайди хьулий, каникуллай шавай, Ваччав увкӀсса чӀумал, Лакрал театр бивкӀун бия районданий пьесарду ххал бан. Жуннин хьамалу увкӀунни Лакрал театр данул артист Серго Хайдакьов, цувагу хьхьичӀ шиннардий театр данул директорну зий увкӀсса. Ванал увкуна: «Ттул уссу Хайдакьов СаэдлуцӀан ухху Москвавив Элмурдал академиялуву зий уссар», – куну. Лаккуоьрус мазрал словарь итабавкьусса элмурдал доктор, профессор. Навама студент ура, пикри буллай ура, щаллусса профессорначӀан ци тӀий гьава тӀий. Га шинал кьалавгра на муначӀан, ламус хъанай.

Хьиривмур шинал каникул-

лай увкӀсса чӀумал мукунма пьеса ккаккан бан театр бивкӀун, Серго Хайдакьов увкӀуна цуница хьамалу буттачӀан. На Москвавив цала уссичӀан кьалавгьсса кӀул хьуну, аьй-бюкьу дуллай ия. «Жу вил бутташал цува Серго, Саэд, Юсуп уссурвал, мюршинийвасса дусталлу тӀий», – ия. Яла сивсуну лавгьссияв на Саэд ХайдакьовлуцӀан ттула буттая ва Сергояту ссалам бусан. Та чӀумал кӀул хьура мунал кулпат Басиратлушал, арс МахӀаммадлушал. Вагу студент ия, тиккува Москвавив Медицинский институтураву дуклакисса. Тания махъ ххал кьавхьуссар. КӀулли медициналул профессоргу хьуну, Американаву яхъанай ушиву.

Цанасса ппурттуву, та чӀумал куннасса авара телевизордал хӀакьираву дакьар. ЦинявначӀа смартфонну, телефонну дур. Амма ттигу-шилагу хьама кьабитай цалчин телевизор кьавкьсса ишгу. Му машин ласавриясса ххаришивугу. Жулайин мухлуькьат бавтӀун Гьарун Саэдовлуясса пьеса телевизорданувух ххал буллалисса кьинигу.

Барчаллагь тӀий ура суратирттал чулуха кумаг бувсса, цӀа дуркьсса суратру ришу Камиль ЧутӀуевлуин ва Динмахаммадлул арснайн МахӀаммадлуин.

МахӀаммад-ХӀаже ЗАГЬДИНОВ,
ш. Москва

Жижара



**КЪУРБААНУЛ
ДУШ КЪУРБАНОВА
ПИРДАВС**

Уттигъанну Каспийскалив аьпалухъхун лавгунни пенсиялийн букканнин «Дагдизель» заводрай зий бивкИсса захИматрал ветеран, Цалчинмур Цувкратусса Къурбаннул душ Къурбанова Пирдавс.

Бувну бур Пирдавс октябрданул 2-нний 1942 шинал. Ва ду-

ниялийн букканнинма аьрайн увцуну ур ппу, занану къавхуну ур. Пирдавсгу хъунма хуну бур буттал лажиннагу къакулну.


Буттал шяраву школа къуртал байхту, Каспийскалив «Дагдизель» заводрай байбихъуну бур ванил захИматрал ххуллу, пенсиялийн букканнин хИрагу хуну бакъар заводрая. Даву ххуйну кИулсса, жаваблувсса Пирдавс коллектираву бусравну бивкИун бур.

Ласнашал, Абдулаьзизлушал, ххюва душ ххаллилу тарбия бувну, чивун буккан бувну бур.

Пирдавс бия хИал бавкъуса, дакИ-аьмал хъинсса, пиш тИий бакъа инсаннах зума къабакъайсса хъамитайпа. Вайннал ужагърай тачИав хъамал чан къашайссия. Ласгу, шаргу хъамал ххирасса, мачча-гъаннал хИурмат бан чялишсса, дакИру тИивтИусса буссия.

Пирдавс аьпалул шаврил къурчИшиву кИидачИлай, жижара буллау буру ванил душ-ваврахъ, куявтурахъ, наслулухъ, махъсса гъанчувнахъ. Имандали лавгун хъуннав, рухИ алжаннул ххари даннав, махънал оьрмурдай барачат бишиннав.

**Цалчинмур ЦувкИулал
жямат**



**СИЛАХИУТТИННУЛ
АРС АБДУЛЛАЕВ
ЖАБРАИЛ**

Апрельданул 26-нний, оьрмуллул 90-шинаву, жуятува личИ хъунни ГъунчИкуьатИрал шяравасса Абдуллаев Жабраил СилахИуттиннул арс.

Буттал шяраву школагу къуртал бувну, ванил бувккиссия Москваливсса Щинал хозияствалул инженертал хИадур байсса

институт. Ванал агъаммур оьрму лавгссар «Главдагестанводстрой» тИисса, Дагъусттаннай яла хъхъичИунсса идаралул Технический управлениялул хъунану. Ва къуллугърайнсса инсан цАкъ айсса ивкИссар Дагъусттаннал обкомрал бюрорай ва къуллугъ цуппагу министрнал къуллугърашал архИалссаннун ккалли байсса бивкИссар.

Лахъсса даражалул пишакар ва каялувчи хИсаврай Жабраил шамийла чил хИкуматирттайн тИайла увккун ивкИссар зун. Ванал хъуннасса гьурттушинна дурссар дуниялийх цИа ларгсса Египетнавусса Асуан бартхъхъири (Асуанская плотина) буллау. Ванийн бувну, ва хИкуматрал председателнал Жабраиллул дуллуссар Египетнал паччахИлугърал медаль. Египетнаву акъассагу, ва зий ивкИссар Сириянаву ва Алжирнаву. Шиккугу Жабраиллул цала лахъсса кИушивугу, лавайсса даражалул инженер ушивугу ккаккан бувссар. «Главдагестанводстройра» лавгун махъ ванил ялагу тамансса шинну дурссар Баргълагавал Каспийскаллал щинал хозияствалул идаралин инженернал къуллугърай зий ва 84 шинаву ахиргу къариртссар хИкуматрал даву.

Жабраиллул Ватандалул ххуллий бувсса захИматрахлу дуллулу дур «Дагъусттаннай лайкъ хъусса строитель», «Аьрасатнал лайкъ хъусса строитель» тИисса цИарду. Вай дакъассагу ванил дур чИарусса грамотарту, барчаллагърал чагъарду, багъа лавайсса пишкашру, дур цаппара медальлугу.

Жабраил ия хъинну дакИнил ххуйсса, инсантурашал авкъусса, гъан-маччаминнан, чИаххув-чИарахнан мудангу кумаг бан хИадурсса, ххишала акъа бусравсса инсан. Ванал цала кулпатрашал хъуни бувну бур кИива душ ва ца оьрчИ. ОьрчИру ччянива лавайсса даражалийсса кИушивурттугу ларсун, цалва-цалва давурттайгу зий, кулпатирттал хъуну бур.

Жабраил аьпалул шаврил къурчИшивугу кИидачИлай, жижара буллау буру кулпатрахъ Лайлихъ, арснахъ Амирдухъ, душ-ваврахъ Амалияхъ ва Жамилахъ, уссурваврахъ МахИаммадухъ ва ХИусайннухъ, цинявппагу махъсса мачча-гъаннахъ. Цал бунагьирттал аьпа баннав, алжан нясив баннав, махънал оьрмурдай барачат бишиннав!

**ГъунчИкуьатИрал жяматрал
цИания Зиябуттин
ХИАЖИМИРЗАЕВ**

ЛачИун букваврил Европанал чемпионатрай

Апрельданул 26-нний Албаниянал Тирана шагърулий къуртал хъунни лачИун букваврил Европанал чемпионат. Муний Дагъусттаннал лачИунбуккултрал дурххунни 6 мусил, 1 арцул ва 2 чарвитул медальду.

Дуниялул лачИун букваврил чаннацИуку Абдурашид Съдуллаевлул цАкъ дунни цалла цИа, Европанал чемпионатрал ряххилчинмур мусил медаль дурххуну.

КИийла олимпий чемпион бакИрай ххув хъунни Австриянал лачИунуку Бенджемин Грейльдуяр. Четвертфиналданий «Оьруснал танк» ххув хъунни Молдавиянал спортсмен Раду Лефтердуяр. Полуфиналданий ванил ух унни Болгариянал лачИунуку АхИмад Магомаев. Финалданий жула цИа дурксса лачИунуку ххув хъунни Словакиянахлу уклау ивкИсса Батырбек Чакуловдуяр 14:3 счетрай.

Турнирданул махърамахъмур кьини Аьрасатнал лачИунбуккултрал дурххунни ялагу цаппара мусил ва чарвитул медальду. Турнирданул мусил медальданун лайкъ хъун-



Абдурашид Съдуллаев

ни Хасавюртлиясса Заур Угуев (61 кило).

Финалданийн иянинн ва ххув хъунни Беларусьнал ва Армениянал лачИунбуккултраяр. Финалданий ванил ух унни Албаниянал лачИундур командалухлу уклау ивкИсса жула ватанлул Залимхан Абакаров 4:0 счетрай. Заур Угуевлул ва кИилчинмур мусил медальди Европанал чемпионатирттай ларсэсса.

Мусил медаль ларсунни му-

кунна Башир МахИаммадовлулу (65 кило), финалданий ва ххув хъунни Албаниянахлу уклау ивкИсса аьрасатлул Ислам Дудаевдуяр 10:0 счетрай.

Европанал чемпионатрал кИилчинмур мусил медаль дурххунни Давид Баевлул, финалданий Молдавиянал лачИунуку Александр Гайдардуяр ххув хъуну.

Мусил медаль дурххун-

ни АхИмад Усмановлулу (79 кило). Ва ххув хъунни Беларусьнал цачИундур командалухлу уклау ивкИсса жула ватанлул МахИаммадхИабиб Кьадиаммадовдуяр 4:2 счетрай.

Цуксса хИайпнугу, цала мурадрайн иян къабювхъунни Муса Мехтихановлула (57 кило). Финалданий ва ух хъунни Азирбижаннахлу уклау ивкИсса Ислам Баразгановдуяр. Мусал дурххунни арцул медаль.

Дуниялул ва Европанал чемпионатирттал призер Тимур Бижоев (74 кило) финалданийн къаивунни. Ва четвертфиналданий ух хъунни Словакиянал цачИундур командалухлу уклау ивкИсса Таймураз Салказановдуяр. Чарвитул медальданул цИанийсса лачИунбуккавриву жула спортсменнашал ччалли увккунни Венгриянал цачИундур командалухлу уклау ивкИсса дагъусттанлул Мурад КъурамахИаммадов. Бижоев ванаар ххув хъунни 1:1 счетрай, ванил муттаэ Мурадлула ца балл зевххуну бур лачИун уккаву хъъара даврихлу.

92 килорал категориялий Дагъусттаннал лачИунуку Аманулла ХИажимахИаммадовлулу ларсун дур чарвитул медаль. Аманулан чансса манзил ливчИун бия финалданийн уккан, амма полуфиналданий ва ух хъунни Болгариянал коман-

далухлу уклау ивкИсса аьрасатлул АхИмад Батаевдуяр.

Чарвитул медальданул цИаний ХИажимахИаммадов лачИун увккунни Турциянал Фатих Алтунбашлушал, жула лачИунуку муттаэнаар ххув хъунни 7:4 счетрай.

Мусил медальданул цИанийсса лачИун уккавриву жула Ибрагим Кьадиевлул бух бувну бур Албаниянал, Турциянал ва Гуржиял муттаэтал. Финалданий ва ххув хъуну ур Азирбижаннахлу уклау ивкИсса аьрасатлул Арсен Жиевдуяр.

Греко-Румуллал зумунусса лачИун буккавриву Аьрасатнал цачИундур командалува ххув хъуну бур Эмир Сефершаев ва Сергей Емелин, кИилчинмур кИану бувгъуну бур Адлет Тюлубаевлул, шамилчинмур – Артур Саргосянлул.

Душру-хъаннил дянив лачИун буккавриву чарвитул медальданул лайкъ хъуну бур Амина Танделова ва Алина Касабиева, чарвитул медальду ларсун дур Елизавета Смирновал, Наталья Малышеввал, Светлана Липатовал ва Кристина Братчиковал.

Европанал чемпионатрай илчинну, греко-римуллал зумунусса ва хъаннил дянивсса лачИунбуккаврий Аьрасатнал цачИундур командалул дурххун дур 8 мусил, 4 арцул ва 7 чарвитул медальду.

ХИ. АБДИЛОВ

Зунтту лекълай бур

Хъанардал шяраву зунтту кИивуцуну, ялавай левкъун нанаврия хъуннасса нигъачИаву хИасул шаврийну, бизан бувну бур шикку ялапар хъанай бивкИсса мукъва кулпат.

Ххуллу, ттукИрал тталлу ва ххаллу лахИунттулу личИаврийну захИматсса тагъар хИасул хъуну дур Мукъархъиял махИлалайсса шяраваллаву. Уриннал, Мукъардал, КИамахъаллал ва Ппалассун-

нал шяраваллурду лирчИун дур транспорт гъан-дучИан къахъанай, чанигу бакъа. Ххуллу марцИ буллау байбишинсса сантгу дакъар, зунтту ялавай багъну найнма бур.

Тлататкьини ДР-лул ХИкуматрал председател Аьбдулмуслим Аьбдулмуслимовлул райондалул бакИчи Зураб Куччаевлушал вертолетрай ялтту увккун ххал дурунни тагъар.

Зулайхат ТАХАКЪАЕВА

Ххувшаврил диктант чирчунни

Дагъусттаннай хъунни дуни-Дяллул халкъуннал дянивсса патриот акция «Диктант Победы». 15 азарунния ливчусса инсантурал чирчунни Ххувшаврил диктант.

Республикалий диктант чичин личИи бувну бия 166 площадка, миннува лавкъусса мукъва кИану ккаккан бувну бия гужирдал структуралда вакилтуран. Агъаммур площадкану хъун-

ни Ленинлул Комсомолданул цИанийсса паркравусса Аьралуннал савлугърал музей.

Акциялий гьуртту хъунни республикалул циняв шагъруду ва районну. Диктант чичин бувкИсса чИявуми бия дуклаки оьрчИру ва жагьилтал.

Акциялий гьуртту хъунни жагьилтурал иширттал министр Камил Саэдов, Аьрасатнал Виричу Энвер Наби-

ев, хасъсса аьралий операциялий цалчин Аьрасатнал Виричу хъусса НурмахИаммад ХИажимахИаммадовлул нину Сапизаат Мазаева, Дагъусттаннал Халкъуннал Мажлисрал депутат Елена Павлюченко. Мероприятилул сакиншинначитал бия Дагъусттаннал Жагьилтурал иширттал министерство ва «Единая Россия» партия.

Андрiana АБДУЛЛАЕВА

Лакрал халкъуннал учаларттава

Чава пьлут бурдалул так лахланни байсса.

Чун дучайссар, ссят дийссар.

Чун ларгукун, аци тлатлай, тлахни гьагьай.

Шанан чай акъа шанийн къаагьаннав.

Шану бивкьулл бачир.

Шатлул куссия тар: «БакI къадирчIарчан, чурх ппелллу ххарараятугу бави».

Я къацливу ккарчив, я ккарчай мурчив дакъуй.

Ярагъуннин гъанчу къакулссар.

ЯхI бакъа дунияллийни-яр лухи гьаттал увгьуну хъинссар.

Анаварсса дуку анаварсса зузалар.

Ахттайнния бизанссия, ахттайнсаннун дукамур духурчан.

БарцIума вацIувату кашил буккан бай.

БурцIингу ттукку нисирал чуттуну чIалан бикIайссар.

Букай ттанни къоллу хIалалсса.

Гъарахъалу щинай, инсан дукралийри ялапар хъа-нахъисса.

Дукралул пачахI ччатIри.

Дукра вилнугу, льякъа ттулархха.

Дуркумур жулар, лирчIмур щиллив къакулссар (лякъа-зарал учала).

Дуссаксса дукауну, дакъамур чIумал ци-бунугу хъунссар.



«Илчи» – маслихатчи Цивппа мюрщинугу, зараллу хъунисса оьнцIул шатри

Аьрщарай дургъумур дияншиврул, бакIлахъру дакъа къаличIаншиврул, къачIивисса захIмат буван багъай зиянчитал бакъа буллау. Цивппа мюрщинугу, хъунисса зараллу биян бувайсса, цивппа хIурхIанугу, анаварсса бушилий диримур дукIайсса зиянчитал бур оьнцIул шатри (слизни). Вайннушалсса талатавриву тIайлабацIуну ишла дуван бюхъайсса, аьрщарангу оьргъашиву хIисаврай мюнпат бусса затру чан дакъар.

ОьнцIул шатран ххирассар ссал-бунугу лувлабикIлан. Муни-яту вайннушалсса талатаву дай-дишин аьркинссар ахъ, дача аьркин дакъамуница марцI баврия (цIинцI, цIинцIуртту, чIапIив, пара, тIантту, хъунтIуллив). Вайннун ялагу ххирассар хъавтесса кIанттурду.

Жулва ахъува оьнцIул шатри бакъа бавриясса мюнпат лахъи къалагантIиссар, чIаххуврай дукъурчан дукъагълагъисса, къуллугъ къабуллалисса участок. Муни-яту чIаххуврашалуру дазуи дайгъузанну дуван аьркинссар.

ОьнцIул шатрал вирусру, грибки, инфекцияртту, личIиличIисса азарду (мучнистая роса, серая гниль ва м.ц.) ппив дувайссар. Мукунна бюхъайссар инсаннан ва ичIаллил хIайвантран нигъачIисса азарду лахъан дувангу, муни-яту вайннийн ка къарщуну хъинссар. Балики оьнцIул шатри батIлан багъарчан, катIри ларххун дурну хъинссар ва даву.

БавтIсса оьнцIул шатри канализациялувун, муркъилийн, парабакIуйн екьибичин къабучIиссар, хъиннува чIяву хъунтIиссар. Вайннул ялун цIу бичирчан, най буна литIунтIиссар. Амма, вай литIун буван тIий, аьрщарайн цIу бичуну къахъинссар, вания аьрщарангу, ваний ххяхлахимунингу зарал буссар.

Мукунма бучIиссар тIахIни-кIичIу шюшайсса хъюмушивугу дуртIусса щинавун бичин, ялтту

къат даркъуну, гъава къанай, литIунтIиссар.

ОьнцIул шатраца цал мура-хас хъуну, вай ххишала зана къахъунсса бази бакъассар. Муни-яту вайннушалсса талатаву дикIан аьркинссар муданнасса ва цими-рагу къяйдалия (каних батIаву, къатIри ва дайгъузаннурду, химиялул сурсатру, канилу думур) шаллу хъусса. Хъуннасса агъамшиву дуссар профилактикалулгу, яни вайннун ххирассар кумур (къавкъсса чIапIив, цIинцI ва цамур) аьрщарай къадитаврил, участокрай марцIшиву, низам дуруччаврил.

ОьнцIул шатри бакъа буван ишла дуван бучIимунил сияхI къачIирисса дур: горчица, лах, лаччи, чимус, дрожжи, пиво, известь, таммаку, опилкарду, ккунукрал ккири, шахъан дурсса кофелуя чIанулу лирчIмур, мюрщисса байлсса чартту...

Горчицалул порошок, оьнцIул шатран бакъасса, цайми зиянчитурангу къаххирассар. Горчица ххяхлахимунил лагма-ялттуса аьрщарайн бичин бучIиссар. Мукунна бучIиссар горчицалул шин (10 литралуву горчицалул 150 грамм дяххан дурну, 6-12 ссятрайгу диртун) аьрщарайн пурх дуван.

Ца яла хъхъичIарамур ва оьнцIул шатран къаххирамур сурсат – лах, бичин аьркинссар дургъумунийн ва аьрщарайн щийнма. Ва даву дуван аьркинссар я марч, я гъарал дакъасса гъантрай.

Лак цайн багъсса оьнцIул шатри най буна литIайссар.

ОьнцIул шатран къаххирассар лаччул, чимусул, горчицалул, базиликрал, къювкъу-мамарттул, гераньдалул, ларал, молочайрал ва цаймигу ххяххиярттал аьнтесса къанкьру. Муни-яту чIаххуврашалсса дазуцIух, оьнцIул шатри чIявусса кIанттурдай дургъуну хъинссар.

ОьнцIул шатран къаххирассар опилкардал къанкьгу, мукунна кофелул къанкьгу (шахъан дувайми).

ОьнцIул шатри ца-цаних батIлай чIун гъан дуляяр, пиволушалсса банка куртI дакъасса хъунтIуллуву дуччин бучIиссар. Дрожжи ххирасса шатри бучIантIиссар пиво дунийн.

Ттунгъасса, кIукIлусса оьнцIул шатран къаххирассар дайлсса зумарду дусса затру, муни-яту цацIун буну ккунукрал ккертту, къакъан буну, хъунисса касакру хъунну карунних мюрш буну, бичин аьркинссар шатри буккайсса кIанттурдай. Вава ххуллий ишла дансса затру цаймигу дуссар: мюрщисса байлсса чартту (хъхъирил зуманиясса хIавлул вичIив), хъаласса къун, гиввхъул ккертту.

Агана аьрши хъуннасса дуну, буцирив оьнцIул шатри батIин хъирив лаллай бакъа-хъурчан, дургъумунил лагма 10-15 см лахъшиврул дусса чапарданул журалийсса дайгъузанну дуван бучIиссар (я муххал, я тIаннул). ОьнцIул шатраца марслуй ххяхлахимуничIан биян къахъунтIиссар.

ХIадур бувссар Бадрижамал АЬЛИЕВАЛ



Газета «Илчи» (Вестник)

Учредитель: Агентство информации и печати Республики Дагестан

Издатель: ГБУ РД «Этномедиахолдинг «Дагестан»

Хъунама: МахIаммаев Аь.М Тел.: 65-00-25

Хъунама редактор: Къардашов Р. Аь. Хъунама редакторнал хъиривма: Башаев Р.М. Жаваб дулайсса секретарь: Исмяилова С.Р.

Редколлегия: Адамов АьбдурахIман МахIаммадович Аьбдуллаев Сапарбаг Аьлиевич Аьлиев ХIажу Сулайманович Исрапилов Артур Анварович Маммаев Сулайман НурагIинович МахIаммадов Юсуп ХIамидович Оьмаров Супиян Расулович Илиясов Марат Сиражуттинович Хасаева Гульшан Рамазановна ХIажимирзаев Зиябуттин Аьбусулиянович ХIусайнаева Качар Абачараевна Шайхъалиев Астемир Икрамович Шалласуев Шалласу Рамазанович Эльдарова Роза ХIажиевна

Отделлал редактортал:

Аьбдуллаева А. П. Аьдилев ХI. А. Рамазанова П. ХI. Тахакъаева З. К.

Корреспондентътал:

АьбдурахIманова З. Т. Аьлиева Б. Д. Саидова И. А.

Корректор:

АхIмадова А.И.

Къазитрал дизайнертал:

Абакарова К. Н. ХIажиева З. У.

Къазитрай дурксса макъаларттаву кIинцI лагмур тIайлашиврул жаваб дулайссар чивчуманал.

Редакция макъалалул залуннал пикрилий рязину бакъахъурчагу, макъала рищайссар, жяматрал цаламур пикри бусанссар тIисса ниятрай. Къазитрайн дурксса макъаларттайн рецензия къачичайссар ва ми залуннахъхъун зана къадайссар.

Къазит буккайссар ножмардий цал. Шинай итабакъайссар 48 номер.

Къазитрал индекс. П7046

Тираж – 1735 экз.

Адрес редакции и издателя:

367018, г. Махачкала, пр-т Насрутдинова, 1а e-mail: ilchi@etnomediadag.ru http://ilchi.info Тел./факс. 66-00-59

Газета «Илчи» зарегистрирована Управлением Федеральной службы по надзору в сфере связи, информационных технологий и массовых коммуникаций по РД. Рег. ПИ № ТУ 05-00424 от 30.04.2019

Газета «Илчи» отпечатана в типографии ООО «Феникс-пресс».


Адрес: РД, Шамилский район, с. Хебда, ул. Сураката Асиятилова. Срок подписания в печать 19.00. Подписано 19.00.

Цена 10 руб.




4 651116 280051

МАХIАЧКЪАЛА



Гъавалул тагъар



ГЪУМУЧИ